

Последование богослужений по мирянскому чину

IV

**Требы, совершаемые мирянином в отсутствие священника при крайней
необходимости**

*Составитель:
диакон Алексей Попов*

Москва
2020

Оглавление

Чинопоследование Святого Крещения, совершаемое мирянином	3
Чинопоследование отпевания, совершаемое мирянином	5
Чинопоследование отпевания, совершаемое мирянином в Светлую Седмицу.....	23
Чинопоследование над усопшим неправославным	35
Чинопоследование Панихиды, совершаемая мирянином о усопшем неправославном.....	39
Библиографический список.....	41

Чинопоследование Святого Крещения, совершаемое мирянином

Святое Крещение – это Таинство, которое вводит человека в Святую Православную Христову Церковь. Совершается оно только священником через трехразовое погружение в воду с крещальной формулой.

Но бывают такие моменты, когда человек хочет креститься, находясь в смертельной опасности (война, катастрофа, гонения, находится в предсмертном состоянии дома), но иерея рядом нет. В такие моменты любому мирянину (включая женщин-христианок) дозволяется совершить Крещение, но затем, как только появится возможность, сообщить об этом духовнику или любому другому священнику. При любых других ситуациях (личная неприязнь к пастырю или лень), которые не могут быть препятствием к совершению Таинства священником, не являются обоснованной причиной и считаются тяжким грехом.

Крещение мирянином обосновывается 44 и 45 правилами святого Никифора Исповедника, которые гласят: «В случае нужды, может крестить и простой монах, точно так же, как по нужде крестит и диакон. Если в каком-либо месте нельзя будет найти священника, то некрещенных младенцев может крестит всякий, кто тут окажется налицо. Нет греха: крестит ли отец, или кто бы то ни был, лишь бы только был христианин». Епископ Далматинско-Истрийский Никодим (1845-1915), комментируя эти правила святого Никифора (758-828), пишет, что «в настоящем правиле святой Никифор говорит, что в случае нужды, может крестить и диакон, равно и простой монах. Мы же, в дополнение к тому, что сказали в толковании... присовокупляем, что, в случае нужды, может крестить и каждый мирянин и даже женщина»¹. Согласно статье протоиерея Владимира Ригина, после Крещения мирянин должен на крещенного надеть белую одежду и нательный крест². Данное указание можно выполнить, если все есть под рукой.

Если крещеный от мирянина человек выжил, то он должен пойти в храм и рассказать о своей ситуации пастырю, чтобы тот восполнил Крещение Таинством Миропомазания. В современном «Требнике» можно найти специальное чинопоследование – «Восполнение от иерея чина Святого Крещения, если совершено было мирянином», перед которым есть следующие важные слова: «Должен есть первее священник тщатливо испытovati того, иже крестил отроча, аще совершающая словеса добре умел и воды естественныя, а не притворения яковья употребил. Аще яковое усумнение обрящет, тогда должен есть самое Крещение совершити, и вся священнодействия исполнити. Егда же ни единого усумнения не будет, тогда точию сии священнодействия исполнит...»³.

¹ Правила св. Никифора Исповедника // Правила Православной Церкви с толкованиями Никодима, епископа Далматинско-Истрийского. Перевод с серб. Репринтное издание. – М.: Издательство «Отчий дом», 2001. С.593.

² Ригин В., прот. Молитва Святых Крещений вкратце, страха ради смертнаго // ЖМП, №12 (1984). С.80.

³ Восполнение от иерея чина Святого Крещения, аще совершено было оно мирянином // Крещение: требный сборник. – М.: Издательство Московской Патриархии Русской Православной Церкви, 2018. С.195.

С: Молитвами святых...

Ч: Аминь. Царю Небесный⁴. Трисвятое. Пресвятая Троице. Отче наш.

С: Молитвами святых...

Ч: Аминь⁵. Господи, помилуй (12 раз). Слава, и ныне. Приидите, поклонимся... (трижды).

50 псалом

Помилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя; яко беззаконие мое аз знаю, и грех мой предо мною есть выну. Тебе Единому согреших и лукавое пред Тобою сотворих, яко да оправдишися во словесех Твоих, и победиши внегда судити Ти. Се бо, в беззакониих зачат есмь, и во гресех роди мя мати моя. Се бо, истину возлюбил еси; безвестная и тайная премудрости Твоя явил ми еси. Окропиши мя иссопом, и очищуся; омыеши мя, и паче снега убелюся. Слуху моему даси радость и веселие; возрадуются кости смиренныя. Отврати лице Твое от грех моих и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего и Духа Твоего Святаго не отыми от мене. Воздаждь ми радость спасения Твоего и Духом Владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего; возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо: всесожжения не благоволиши. Жертва Богу дух сокрушен; сердце сокрушенно и смиренно Бог не уничижит. Ублажи, Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая; тогда возложат на олтарь Твой тельцы.

Символ веры

Верую во единого Бога Отца Вседержителя, Творца небу и земли, видимым же всем и невидимым. И во единого Господа Иисуса Христа, Сына Божия, Единородного, Иже от Отца рожденного прежде всех век. Света от Света, Бога истинна от Бога истинна, рожденна, несотворенна, единосущна Отцу, Имже вся быша. Нас ради человек и нашего ради спасения сшедшаго с небес и воплотившагося от Духа Свята и Марии Девы и вочеловечшася. Распятого же за ны при Понтийстем Пилате, и страдавша, и погребенна. И воскресшаго в третий день по Писанием. И возшедшаго на Небеса, и сидяща одесную Отца. И паки грядущаго со славою судити живым и мертвым, Егоже Царствию не будет конца. И в Духа Святаго, Господа, Животворящаго, Иже от Отца исходящаго, Иже со Отцем и Сыном спокланяема и сславима, глаголавшаго пророки. Во едину Святую, Соборную и Апостольскую

⁴ От Пасхи до отдания праздника Светлого Христова Воскресения вместо молитвы «Царю Небесный» читается или поется тропарь Пасхи. От праздника Вознесения Господня до дня Пятидесятницы сразу после возгласа читается Трисвятое по Отче наш.

⁵ Если человек может внезапно умереть, то дозволяется опустить 50 псалом и Символ веры.

Церковь. Исповедую едино крещение во оставление грехов. Чаю воскресения мертвых, и жизни будущего века. Аминь.

С. погружает в воду троекратно человека⁶ со словами:

Крещается раб Божий **(или раба Божия) (имя)** во имя Отца. Аминь **(первое погружение)**. И Сына. Аминь **(второе погружение)**. И Святаго Духа. Аминь **(третье погружение)**.

Если возможно, на новокрещенного надевается белая одежда и нательный крест⁷.

Ч: Честнейшую Херувим и славнейшую без сравнения Серафим, без истления Бога Слова рождшую, сущую Богородицу Тя величаем.

Слава, и ныне. Господи, помилуй (трижды). Господи, благослови.

С. творит отпуст: Иже во Иордане креститесь изволивый от Иоанн нашего ради спасения, Господи Иисусе Христе, Сыне Божий, молитв ради Пречистыя Твоея Матере, преподобных и богоносных Отец наших и всех святых, помилуй и спаси нас, яко Благ и Человеколюбец.

Ч: Аминь. Господи, помилуй (трижды).

Увещание! Если человек, принявший Святое Крещение от мирянина, выжил, то он должен обязательно прийти в храм и восполнить свое вхождение в Церковь Христову, обратиться к священнику, который совершит над новопросвещенным Таинство Миропомазания.

Чинопоследование отпевания, совершаемое мирянином

Чинопоследование отпевания может совершить мирянин только в том случае, если священник по уважительной причине не может прибыть в местность (например, гонения, война и т.д.). Если кто-либо из мирян дерзнет совершать отпевание, когда была возможность пригласить священника, тот сильно согрешает. Так же согрешает иерей, если из-за своей лени откажется совершать отпевание и переложит его на мирянина.

В Советское время в селах, где были разрушены богоборцами храмы, а священники – арестованы и отправлены в ссылки или вовсе были расстреляны, нередко можно было наблюдать совершение мирянами Чина отпевания. Само чинопоследование практически остается таким же, как и при совершении этой службы иереем (кроме возгласов).

По православной традиции, Чин отпевания совершается над усопшим православным христианином на третий день после его преставления. Если возможно, гроб приносится заранее и ставится в храме (часовне, моленной доме) ногами на восток, т.е. в сторону Алтаря. В изголовье усопшего ставится небольшой

⁶ Если погрузить полностью человека невозможно (война, катастрофа, человек прикован к кровати и т.д.), то крестить можно обливательно.

⁷ См. Ригин В., прот. Молитва Святых Крещений вкратце, страха ради смертнаго // ЖМП, №12 (1984). С.80.

подсвечник, на лоб кладется венчик. Разрешительная молитва в Чине отпевания, совершаемое мирянином, не читается: она прочитывается иереем тогда, когда это будет возможно.

Все время до отпевания должно совершаться чтение Псалтири с особыми заупокойными молитвами. Также время от времени у гроба можно служить Заупокойные литии. Накануне вечером около гроба можно совершить Панихиду.

Старший выходит ко гробу, становится около аналая, который заранее ставится в изголовье усопшего. Сделав три малых поклона, начинает Чин отпевания.

С: Молитвами святых отец наших...

Ч: Аминь. Трисвятое по Отче наш.

С: Молитвами святых отец наших...

Ч: Аминь. Господи, помилуй (12 раз). Слава, и ныне. Приидите, поклонимся... (трижды).

Псалом 90

Живый в помощи Вышняго, в крове Бога небеснаго водворится. Речет Господеви: заступник мой еси и прибежище мое, Бог мой, и уповаю на Него. Яко Той избавит тя от сети ловчи, и от словесе мятежна, плещма Своима осенит тя, и под криле Его надеешися, оружием обыдет тя истина Его. Не убоишися от страха ночнаго, от стрелы летящая во дни, от вещи во тьме преходящая, от сряща и беса полуденнаго. Падет от страны твоей тысяща, и тьма одесную тебе, к тебе же не приблизится, обаче очима твоима смотриши и воздаяние грешников узриши. Яко Ты, Господи, упование мое; Вышняго положил еси прибежище твое. Не приидет к тебе зло, и рана не приблизится телеси твоему, яко Ангелом Своим заповесть о тебе, сохрани ти во всех путех твоих. На руках возмут тя, да не когда преткнеши о камень ногу твою; на аспида и василиска наступиши, и попереши льва и змия. Яко на Мя упова, и избавлю и; покрыю и, яко позна имя Мое. Воззовет ко Мне, и услышу его, с ним есмь в скорби, изму его и прославлю его, долготою дней исполню его и явлю ему спасение Мое.

После чтения 90 псалма начинается стихословие 17 кафизмы⁸:

Затем Старший читает всю кафизму с указанными молитвами. В это время хор поет припев: «Благословен еси Господи, / научи мя оправданием Твоим».

Х: Блажени непорочнии в путь, ходящии в законе Господни.

Припев: Благословен еси Господи, / научи мя оправданием Твоим.

Блажени испытующии свидения Его, всем сердцем възыщут Его.

Припев: Благословен еси, Господи, / научи мя оправданием Твоим.

⁸ Есть традиция, по которой опускается чтение 17 кафизмы. В таком случае после чтения 90 псалма сразу поются тропари по непорочным.

С. (хор поет тихо параллельно стих «Благословен еси, Господи...»):

Не делающие бо беззакония, в путех Его ходиша. Ты заповедал еси заповеди Твоя сохранить зело. Дабы исправился путь мой, сохранить оправдания Твоя. Тогда не постыжуся, внемля прирети ми на вся заповеди Твоя. Исповемся Тебе в правости сердца, внемля научити ми ся судьбам правды Твоея. Оправдания Твоя сохраню: не остави мене до зела. В чесом исправит юнейший путь свой? Внемля сохранить словеса Твоя. Всем сердцем моим взысках Тебе, не отрини мене от заповедей Твоих. В сердце моем скрых словеса Твоя, яко да не согрешу Тебе. Благословен еси Господи, научи мя оправданием Твоим. Устнама моима возвестих вся судьбы уст Твоих. На пути свидений Твоих насладихся, яко о всяком богатстве. В заповедех Твоих поглумлюся, и уразумею пути Твоя. Во оправданиях Твоих поучуся, не забуду словес Твоих. Воздаждь рабу Твоему: живи мя, и сохраню словеса Твоя. открий очи мои, и уразумею чудеса от закона Твоего. Пришлец аз есмь на земли: не скрый от мене заповеди Твоя. Возлюби душа моя возжелати судьбы Твоя на всякое время. Запретил еси гордым: прокляти уклоняющиеся от заповедей Твоих. Отыми от мене понос и уничижение, яко свидений Твоих взысках. Ибо седоша князи, и на мя клеветаша, раб же Твой глумляшеся во оправданиях Твоих. Ибо свидения Твоя поучение мое есть, и совети мои оправдания Твоя. Прильпе земли душа моя, живи мя по словеси Твоему. Пути моя возвестих, и услышал мя еси: научи мя оправданием Твоим. Путь оправданий Твоих вразуми ми, и поглумлюся в чудесах Твоих. Воздрема душа моя от уныния, утверди мя в словесах Твоих. Путь неправды отстави от мене, и законом Твоим помилуй мя. Путь истины изволих, и судьбы Твоя не забых. Прилепихся свидением Твоим, Господи, не посрами мене. Путь заповедей Твоих текох, егда разширил еси сердце мое. Законоположи мне, Господи, путь оправданий Твоих, и взыщу и выну. Вразуми мя, и испытаю закон Твой, и сохраню и всем сердцем моим. Настави мя на стезю заповедей Твоих, яко тую восхотех. Приклони сердце мое во свидения Твоя, а не в лихоимство. Отврати очи мои, еже не видети суеты, в пути Твоем живи мя. Постави рабу Твоему слово Твое в страх Твой. Отыми поношение мое, еже непщевах, яко судьбы Твоя благи. Се, возжелах заповеди Твоя, в правде Твоей живи мя. И да приидет на мя милость Твоя, Господи, спасение Твое по словеси Твоему, и отвечаю поношающим ми слово, яко уповах на словеса Твоя. И не отыми от уст моих словесе истинна до зела, яко на судьбы Твоя уповах. И сохраню закон Твой выну, в век и в век века. И хождах в широте, яко заповеди Твоя взысках, и глаголах о свидениях Твоих пред цари, и не стыдяхся. И поучахся в заповедех Твоих, яже возлюбих зело: и воздвигох руце мои к заповедем Твоим, яже возлюбих, и глумляхся во оправданиях Твоих. Помяни словеса Твоя рабу Твоему, ихже упование дал ми еси. То мя утеши во смиреннии моем, яко слово Твое живи мя. Гордии законо-преступоваху до зела, от закона же Твоего не уклонихся. Помянух судьбы Твоя от века, Господи, и утешихся. Печаль прият мя от грешник, оставляющих закон Твой. Пета бяху мне оправдания Твоя на месте пришельствия моего. Помянух в нощи имя Твое, Господи, и сохраних закон Твой. Сей бысть мне, яко оправданий Твоих взысках. Часть моя еси, Господи: рех сохранить закон Твой. Помолихся лицу Твоему всем сердцем моим: помилуй мя по словеси Твоему. Помыслих пути Твоя, и возвратих нозе мои во свидения Твоя. Уготовихся и не смутихся сохранить заповеди Твоя. Ужя грешник обязашася мне, и закона Твоего не забых. Полунощи востах, исповедатися Тебе о судьбах правды Твоея. Причастник аз есмь всем боящимся Тебе, и хранящим заповеди Твоя. Милости Твоея, Господи,

исполнь земля, оправданием Твоим научи мя. Благодсть сотворил еси с рабом Твоим, Господи, по словеси Твоему. Благодсти и наказанию и разуму научи мя, яко заповедем Твоим веролах. Прежде даже не смирити ми ся, аз прегреших, сего ради слово Твое сохраних. Благ еси Ты, Господи, и благодстию Твоею научи мя оправданием Твоим. Умножися на мя неправда гордых, аз же всем сердцем моим испытаю заповеди Твоя. Усырися яко млеко сердце их, аз же закону Твоему поучихся.

Х: Слава Отцу и Сыну и Святому Духу. / Благо мне, яко смирил мя еси, яко да научуся оправданием Твоим.

И ныне и присно, и во веки веков. Аминь / Благ мне закон уст Твоих, паче тысящ злата и сребра.

Господи, помилуй (трижды). Господи, Иисусе Христе, Сыне Божий, помилуй нас грешных.

С: Боже духов и всякия плоти, смерть поправый и диавола упразднивый, и живот миру Твоему даровавый! Сам Господи, упокой души усопших раба Твоего (*рабы Твоя*) (**имя**), в месте светле, в месте злачне, в месте покойне, отнюдуже отбеже болезнь, печаль и воздыхание. Всякое согрешение, содеянное ими, словом, или делом, или помышлением, яко Благий Человеколюбец Бог прости, яко несть человек, иже жив будет и не согрешит, Ты бо един, кроме греха, правда Твоя правда во веки, и слово Твое истина. Яко Ты еси воскресение, жизнь и покой души усопших раба Твоего (*рабы Твоя*) (**имя**), Христе Боже наш, и Тебе славу возсылаем, со Безначальным Твоим Отцем и Пресвятым и Благим и Животворящим Твоим Духом, ныне и присно и во веки веков.

Х: Аминь.

Руце Твои сотвористе мя и создасте мя, вразуми мя, и научуся заповедем Твоим.

Припев: Спасе, / Спаси мя.

Боящийся Тебе узрят мя и возвеселятся, яко на словеса Твоя уполах.

Припев: Спасе, / Спаси мя.

С. (хор параллельно тихо параллельно стих «Спасе, / Спаси мя»):

Разумех, Господи, яко правда судьбы Твоя, и воистинну смирил мя еси. Буди же милость Твоя, да утешит мя по словеси Твоему рабу Твоему. Да приидут мне щедроты Твоя, и жив буду, яко закон Твой поучение мое есть. Да постыдятся гордии, яко неправедно беззаконноваша на мя, аз же поглумлюся в заповедех Твоих. Да обратят мя боящийся Тебе и ведящий свидения Твоя. Буди сердце мое непорочно во оправданиях Твоих, яко да не постыжуся. Исчезает во спасение Твое душа моя, на словеса Твоя уполах. Исчезоша очи мои в слово Твое, глаголюще: когда утетиши мя? Зане бых яко мех на слане, оправданий Твоих не забых. Колико есть дней раба Твоего? Когда сотвориши ми от гонящих мя суд? Поведаша мне законопреступницы глумления, но не яко закон Твой, Господи. Вся заповеди Твоя истина; неправедно погнаша мя, помози ми. Вмале не скончаша мене на земли, аз же не оставих заповедей Твоих. По милости Твоей живи мя, и сохраню свидения уст Твоих. Во век, Господи, слово Твое

пребывает на Небеси. В род и род истина Твоя. Основал еси землю, и пребывает. Учинением Твоим пребывает день: яко всяческая работна Тебе. Яко аще бы не закон Твой поучение мое был, тогда убо погибл бых во смирении моем. Во век не забуду оправданий Твоих, яко в них оживил мя еси. Твой есмь аз, спаси мя: яко оправданий Твоих взысках. Мне ждаша грешницы погубити мя, свидения Твоя разумех. Всякия кончины видех конец, широка заповедь Твоя зело. Коль возлюбих закон Твой, Господи, весь день поучение мое есть. Паче враг моих умудрил мя еси заповедию Твоею, яко в век моя есть. Паче всех учащих мя разумех, яко свидения Твоя поучение мое есть. Паче старец разумех, яко заповеди Твоя взысках. От всякаго пути лукава возбраних ногам моим, яко да сохраню словеса Твоя. От судеб Твоих не уклонихся, яко Ты законоположил ми еси. Коль сладка гортани моему словеса Твоя: паче меда устом моим. От заповедей Твоих разумех: сего ради возненавидех всяк путь неправды. Светильник ногама моима закон Твой, и свет стезям моим. Кляхся, и поставих сохранити судьбы правды Твоея. Смирехся до зела, Господи, живи мя по словеси Твоему. Вольная уст моих, благоволи же, Господи, и судьбам Твоим научи мя. Душа моя в руку Твоею выну, и закона Твоего не забых. Положиша грешницы сеть мне, и от заповедей Твоих не заблудих. Наследовах свидения Твоя во век, яко радование сердца моего суть. Приклоних сердце мое, сотворити оправдания Твоя в век за воздаяние. Законопреступныя возненавидех, закон же Твой возлюбих. Помощник мой и заступник мой еси Ты, на словеса Твоя уповах. Уклонитесь от мене лукавнующии, и испытаю заповеди Бога моего. Заступи мя по словеси Твоему, и жив буду, и не посрами мене от чаяния моего. Помози ми, и спасуся, и поучуся во оправданиях Твоих выну. Уничижил еси вся отступающыя от оправданий Твоих, яко неправедно по-мышление их. Преступающыя непщевах вся грешныя земли, сего ради возлюбих свидения Твоя. Пригвозди страху Твоему плоти моя: от судеб бо Твоих убояхся. Сотворих суд и правду, не предаждь мене обидящим мя. Восприими раба Твоего во благо, да не оклеветают мене гордии. Очи мои исчезосте во спасение Твое и в слово правды Твоея: сотвори с рабом Твоим по милости Твоей, и оправданием Твоим научи мя. Раб Твой есмь аз: вразуми мя, и увем свидения Твоя. Время сотворити Господеви: разориша закон Твой. Сего ради возлюбих заповеди Твоя паче злата и топазия. Сего ради ко всем заповедем Твоим направляхся, всяк путь неправды возненавидех. Дивна свидения Твоя: сего ради испыта их душа моя. Стопы моя направи по словеси Твоему, и да не обладает мною всякое беззаконие. Избави мя от клеветы человеческия, и сохраню заповеди Твоя. Лице Твое просвети на раба Твоего, и научи мя оправданием Твоим. Исходища водная изведосте очи мои: понеже не сохраних закона Твоего. Праведен еси, Господи, и прави суди Твои. Заповедал еси правду свидения Твоя, и истину зело. Истаяла мя есть ревность Твоя: яко забыша словеса Твоя врази мои. Разжжено слово Твое зело, и раб Твой возлюбил е. Юнейший аз есмь и уничижен: оправданий Твоих не забых. Правда Твоя правда во век, и закон Твой истина. Скорби и нужды обретоша мя: заповеди Твоя поучение мое. Правда свидения Твоя в век: вразуми мя, и жив буду. Воззвах всем сердцем моим, услыши мя, Господи, оправдания Твоя взыщу. Воззвах Ти, спаси мя, и сохраню свидения Твоя. Предварих в безгодии и воззвах, на словеса Твоя уповах. Предваристе очи мои ко утру, поучитися словесем Твоим. Глас мой услыши, Господи, по милости Твоей: по судьбе Твоей живи мя. Приближишася гонящии мя беззаконием: от закона же Твоего удалишася. Близ еси Ты, Господи, и вси путие Твои истина. Исперва познах от свидений Твоих, яко в век

основал их еси. Суди суд мой, и избави мя: словесе ради Твоего живи мя. Далече от грешник спасение, яко оправданий Твоих не взыскаша. Щедроты Твоя многи, Господи, по судьбе Твоей живи мя. Мнози изгонящии мя и стужающии ми: от свидений Твоих не уклонихся. Видех неразумевающыя и истаях: яко словес Твоих не сохраниша. Виждь, яко заповеди Твоя возлюбих: Господи, по милости Твоей живи мя. Начало словес Твоих истина, и во век вся судьбы правды Твоя. Князи погнаша мя туне: и от словес Твоих убояся сердце мое. Возрадуяся аз о словесех Твоих, яко обретаяй корысть многу. Неправду возненавидех и омерзих: закон же Твой возлюбих. Седмерицею днем хвалих Тя о судьбах правды Твоя. Мир мног любящим закон Твой, и несть им соблазна. Чаях спасения Твоего, Господи, и заповеди Твоя возлюбих. Со-храни душа моя свидения Твоя, и возлюби их зело. Сохраних заповеди Твоя и свидения Твоя, яко вси путие мои пред Тобою, Господи. Да приблизится моление мое пред Тя: Господи, по словеси Твоему вразуми мя. Да внидет прошение мое пред Тя, Господи, по словеси Твоему избави мя. Отрыгнут устне мои пение, егда научиши мя оправданием Твоим. Провещает язык мой словеса Твоя, яко вся заповеди Твоя правда. Да будет рука Твоя еже спасти мя, яко заповеди Твоя изволих. Возжелах спасение Твое, Господи, и закон Твой поучение мое есть.

Х: Слава Отцу и Сыну и Святому Духу. / Жива будет душа моя, и восхвалит Тя: и судьбы Твоя помогут мне.

И ныне и присно, и во веки веков. Аминь. / Заблудих, яко овча погибшее: взыщи раба Твоего, яко заповедей Твоих не забых.

Господи, помилуй (трижды). Господи, Иисусе Христе, Сыне Божий, помилуй нас, грешных.

С: Боже духов и всякия плоти, смерть поправый и диавола упразднивый, и живот миру Твоему даровавый! Сам Господи, упокой души усопших раба Твоего (*рабы Твоя*) (**имя**), в месте светле, в месте злачне, в месте покойне, отнюдуже отбеже болезнь, печаль и воздыхание. Всякое согрешение, содеянное ими, словом, или делом, или помышлением, яко Благий Человеколюбец Бог прости, яко несть человек, иже жив будет и не согрешит, Ты бо един, кроме греха, правда Твоя правда во веки, и слово Твое истина. Яко Ты еси воскресение, жизнь и покой души усопших раба Твоего (*рабы Твоя*) (**имя**), Христе Боже наш, и Тебе славу возсылаем, со Безначальным Твоим Отцем и Пресвятым и Благим и Животворящим Твоим Духом, ныне и присно и во веки веков.

Х: Аминь.

Тропари по непорочных⁹

Благословен еси, Господи, / научи мя оправданием Твоим.

Святых лик обрете источник жизни и дверь райскую, / да обрящу и аз путь покаянием, / погибшее овча аз есмь, // воззови мя, Спасе, и спаси мя.

Благословен еси, Господи, / научи мя оправданием Твоим.

⁹ Старший совершает каждение гроба, иконостаса и молящихся.

Агнца Божия проповедавшие / и заклани бывше якоже агнцы, / и к жизни нестареемей, святии; / и присносущней преставльшися: / Того прилежно, мученицы, молити // долгов разрешение нам даровати.

Благословен еси, Господи, научи мя оправданием Твоим.

В путь узкий хождшии прискорбный, / вси в житии крест яко ярем взявшии / и Мне последовавшие верою, / приидите насладитесь, / ихже уготовах вам почестей // и венцев небесных.

Благословен еси, Господи, / научи мя оправданием Твоим.

Образ есмь неизреченныя Твоя славы, / аще и язвы ношу прегрешений, / ущедри Твое создание, Владыко, / и очисти Твоим благоутробием, / и возжеленное Отечество подаждь ми, // рая паки жителя мя сотворяя.

Благословен еси, Господи, / научи мя оправданием Твоим.

Древле убо от не сущих создавый мя / и образом Твоим Божественным почтый, / преступлением же заповеди, / паки мя возвративый в землю, от неяже взят бых, / но еже по подобию возведи // древнею добротою возобразитися.

Благословен еси, Господи, / научи мя оправданием Твоим.

Упокой, Боже, рабы Твоя (*раба Твоего или рабы Твоя*) и учини их (*его или ея*) в Раи, / идеже лица святых, Господи, / и праведницы сияют яко светила; / усопшия рабы Твоя (*усопшаго раба Твоего или усопшия рабы Твоя*) упокой, / презирая их (*его или ея*) вся согрешения.

Слава Отцу и Сыну и Святому Духу.

Трисиятельное Единого Божества, благочестно поем вопиюще: / Свят еси, Отче Безначальный, / Собезначальный Сыне, и Божественный Душе; / просвети нас, верою Тебе служащих, // и вечного огня исхити.

И ныне и присно и во веки веков. Аминь.

Радуйся, Чистая, Бога плотию рождающая во спасение всех, / Еюже род человеческий обрете спасение, / Тобою да обрящем рай, // Богородице Чистая, Благословенная!

Аллилуиа, Аллилуиа, Аллилуиа, слава Тебе, Боже (трижды). Господи, помилуй (12 раз). Господи, Иисусе Христе, Сыне Божий, помилуй нас, грешных.

С: Помяни, Господи Боже наш, в вере и надежди живота вечного усопших раб Твоих (*усопшаго раба Твоего или усопшия рабы Твоя*) (*имена*), и яко Благ и Человеколюбец, отпускай грехи и потребляя неправды, ослаби, остави и прости вся вольная их (*его или ея*) согрешения и невольная, возставляя их (*его или ея*) во Святое Второе Пришествие Твое в причастие вечных Твоих благ, ихже ради в Тя Единого верова, Истинного Бога и Человеколюбца, яко Ты еси воскресение и живот, и покой рабам Твоим (*рабу Твоему или рабе Твоей*) (*имена*), Христе Боже наш, и Тебе славу возсылаем, со безначальным Твоим Отцем, и с Пресвятым Духом, ныне и присно и во веки веков.

[Возможно чтение иной молитвы Старшим:

Боже духов и всякия плоти, смерть поправый и диавола упразднивый, и живот миру Твоему даровавый! Сам Господи, упокой души усопших рабов Твоих (*душу усопшего раба Твоего или душу усопшия рабы Твоея*) (**имена**), в месте светле, в месте злачне, в месте покойне, отнюдуже отбеже болезнь, печаль и воздыхание. Всякое согрешение, содеянное ими (*им или ею*), словом, или делом, или помышлением, яко Благий Человеколюбец Бог прости, яко несть человек, иже жив будет и не согрешит, Ты бо един, кроме греха, правда Твоя правда во веки, и слово Твое истина. Яко Ты еси воскресение, жизнь и покой души усопших раб Твоих (*души усопшего раба Твоего или усопшия рабы Твоея*) (**имена**), Христе Боже наш, и Тебе славу возсылаем, со Безначальным Твоим Отцем и Пресвятым и Благим и Животворящим Твоим Духом, ныне и присно и во веки веков¹⁰.]

Х: Аминь.

Седален, глас 5

Покой, Спасе наш, / с праведными рабы Твоя (*раба Твоего или рабы Твоея*), / и сия (*сего или сию*) всели во двory Твоя, / якоже есть писано, / презирая яко Благ, прегрешения их (*его или ея*), вольная и невольная, // и вся яже в ведении и не в ведении, Человеколюбче.

Слава Отцу и Сыну и Святому Духу, / и ныне и присно и во веки веков. Аминь.

От Девы возсиявый миру, Христе Боже, / сыны света Тою показавый, помилуй нас.

Псалом 50¹¹

Помилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омый мя от беззакония моего, и от греха моего очисти мя; яко беззаконие мое аз знаю, и грех мой предо мною есть выну. Тебе Единому согреших и лукавое пред Тобою сотворих, яко да оправдишися во словесех Твоих, и победиши внегда судити Ти. Се бо, в беззакониих зачат есмь, и во гресех роди мя мати моя. Се бо, истину возлюбил еси; безвестная и тайная премудрости Твоея явил ми еси. Окропиши мя иссопом, и очищуся; омыеши мя, и паче снега убелюся. Слуху моему даси радость и веселие; возрадуются кости смиренныя. Отврати лице Твое от грех моих и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего и Духа Твоего Святаго не отыми от мене. Воздаждь ми радость спасения Твоего и Духом Владычним утверди

¹⁰ Запрещать мирянам читать эту молитву, называя ее только священнической, нельзя. Вот что пишет сщисп. Афанасий (Сахаров): «Заканчивается молитва текстом возгласа: “Яко Ты еси воскресение и живот”. Но в данном случае этот глас мирянину не надо заменять возгласом “Молитвами святых отец”, ибо это здесь употребляется не в качестве нарочитого иерейского возгласа, в отличие от других молитвословий, читаемых клириками или мирянами, а составляет окончание молитвы, подобно тому, как им же оканчивается и заупокойная молитва на полунощнице или как некоторые молитвы, предназначенные для чтения не иереями, например, молитвы междочасий 1-го и 3-го часов, молитва 9-го часа и др.» (IV. Поминовение усопших на домашней молитве // Афанасий (Сахаров), еп. О поминовении усопших по Уставу Православной Церкви. – Киев: Общество любителей православной литературы Издательство имени святителя Льва, папы Римского, 2008. С.466-467)

¹¹ На практике опускается.

мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего; возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо: всесожжения не благоволиши. Жертва Богу дух сокрушен; сердце сокрушенно и смиренно Бог не уничижит. Ублажи, Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая; тогда возложат на алтарь Твой тельцы.

Канон, глас 6¹²

Песнь 1

Ирмос: Яко по суху пешешествовав Израиль, / по бездне стопами, / гонителя фараона видя потопляема, // Богу победную песнь поим вопияше.

Припев: Дивен Бог во святых Своих, Бог Израилев.

В небесных чертозех выну доблии мученицы молят Тя, Христе, егоже (юже от земли преставил еси вернаго *(верную)*), вечных благ получить сподоби.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Украшенный всяческая, животное смешенное, посреде мя, человека, смирения вкупе и величества, создал еси, темже раба Твоего *(рабы Твоея)* душу, Спасе, упокой.

Слава¹³: Рая жителя и земледателя в начале мя учинил еси, преступльша же Твою заповедь изгнал еси, темже раба Твоего *(рабы Твоея)* душу, Спасе, упокой.

И ныне: Иже от ребра Создавый Еву, прежде нашу праматерь, из Пречистаго Твоего чрева в плоть одевается, еюже смерти крепость, Чистая, разруши.

Песнь 3

Ирмос: Несть свят, якоже Ты, Господи Боже мой, / вознесый рог верных Твоих, Блаже, / и утвердивый нас на камени // исповедания Твоего.

Припев: Дивен Бог во святых Своих, Бог Израилев.

Законно пострадаша Твои мученицы, Жизнодавче, и венцем победы украсившися, прилежно преставльшемуся верному *(преставльшейся верней)* вечное избавление подают.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Наказав первее многими чудесы и знаменьями мене, заблудшаго, напоследок самого Себе истощил еси, яко сострадатель, и поискав обрел и спасл еси.

Слава: От текущих непостоятельныя тли, к Тебе прешедшаго *(прешедшую)*, в селениях вечных жити радостно сподоби, Блаже, оправдав верою же и благодатию.

¹² Существует традиция, по которой следует Старшему читать тропари канона, а припевы поются хором.

¹³ «Слава Отцу и Сыну и Святому Духу» и «И ныне и присно, и во веки веков. Аминь» поются хором по подобию припевов к тропарям канона.

И ныне: Несть непорочна, якоже Ты, Пречистая Богомати, Едина бо от века Бога истиннаго зачала еси во чреве, смерти разрушившаго силу.

Х: Господи, помилуй (12 раз). Господи, Иисусе Христе, Сыне Божий, помилуй нас, грешных.

С: «Помяни, Господи, Боже наш...» или «Боже духов и всякия плоти...»

Х: Аминь.

Седален, глас 6

Воистинну суета всяческая, / житие же сень и соние, / ибо всеу мятется всяк земнородный, / якоже рече Писание: / егда мир приобретаем, / тогда во гроб вселимся, / идеже вкупе царие и нищии. / Темже, Христе Боже, / преставльшагося (*преставльшуюся*) упокой, / яко Человеколюбец.

Слава: / и ныне: Всесвятая Богородице, / во время живота моего не остави мене, / человеческого предстательству не ввери мя, // но Сама заступи и помилуй мя.

Песнь 4

Ирмос: Христос моя сила, / Бог и Господь, честная Церковь / боголепно поет, взывающи // от смысла чиста, о Господе празднующи.

Припев: Дивен Бог во святых Своих, Бог Израилев.

Премудрости большее являя познание, и еже о дарех многосовершенная, Владыко, благодостыни, мученическая лики ангелом сочел еси.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Неизреченная славы Твоя получитьи сподоби к Тебе преставльшагося (*преставльшуюся*), идеже, Христе, веселящихся есть жилище, / и глас чистаго радования.

Слава: Поюща (*поюще*) прими в Божественную державу Твою, егоже (*юже*) от земли приял еси, чадо света сего (*сию*) соделова, греховную мглу очищая, Многомилостиве.

И ныне: Приятелище пречистое, храм всенепорочный, ковчег всесвятый, девственное место священия, Тебе, доброту Иаковлю, Владыка избрал еси.

Песнь 5

Ирмос: Божиим светом Твоим, Блаже, / утренюющих Ти души / любовию озари, молюся, / Тя ведети, Слове Божий, / истиннаго Бога, / от мрака греховнаго взывающа.

Припев: Дивен Бог во святых Своих, Бог Израилев.

Яко всеплодие священное, и яко начаток человеческого естества, мученицы, прославленному принесшеса Богу, / нам спасение присно ходатайствуют.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Небеснаго пребывания, раздаяния дарований сподоби, Господи, прежде усопшаго вернаго раба Твоего (*усопшую верную рабу Твою*), подая прегрешений избавление.

Слава: Иже един естеством Животворец, иже благи воистинну неизследима пучина, скончавшагося (*скончавшуюся*) Царствия Твоего сподоби, Щедре, Едине Безсмертне.

И ныне: Крепость и пение, из Тебе, Владычице, миру Рождейся, и спасение быв погбшим, иже от адовых врат избавляяй, верою Тебе блажация.

Песнь 6

Ирмос: Житейское море, / воздвигаемое зря напастей бурю, / к тихому пристанищу Твоему притек, вопию Ти: / возведи от тли живот мой, // Многомилостиве.

Припев: Дивен Бог во святых Своих, Бог Израилев.

На Кресте пригвождаемь, мученическия лики к Себе собрал еси, подражация страсть Твою, Блаже. Темже молимся Ти: к Тебе преставльшагося (*преставльшуюся*) ныне упокой.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Неизреченною славою Твоею, егда приидеши страшно судити миру всему на облацех, благоволи светло срести Тебе, Избавителю, егоже (*юже*) от земли приял еси вернаго раба Твоего (*верную рабу Твою*).

Слава: Источник жизни Сый, мужеством Божественным, Владыко, окованная изводяй, раба Твоего (*рабу Твою*) к Тебе верно отшедшаго (*отшедшую*) в сладости райстей всели.

И ныне: В землю возвратихомся, преступльше Божию заповедь Божественную, Тобою же Дево, на небо от земли вознесохомся, тлю смертную оттрясе.

Х: Господи, помилуй (12 раз). Господи, Иисусе Христе, Сыне Божий, помилуй нас, грешных.

С: «Помяни, Господи, Боже наш...» или «Боже духов и всякия плоти...»

Х: Аминь.

Кондак, глас 8

Со святыми упокой, / Христе, души раб Твоих (*душу раба Твоего или рабы Твоея*), / идеже несть болезнь, ни печаль, / ни воздыхание, // но жизнь безконечная.

Икос, глас тот же

Сам Един еси Безсмертный, / сотворивый и создавый человека: / земнии убо от земли создахомся, / и в землю туюжде пойдём, / якоже повелел еси, / Создавый мя и рекии ми: / яко земля еси и в землю отыдеши, / аможе вси человецы пойдём, / надгробное рыдание творяще песнь: / Аллилуиа, Аллилуиа, Аллилуиа.

Песнь 7

Ирмос: Росодательну убо пещь / содела Ангел / преподобным отроком, / халдеи же опаляющее / веление Божие, / мучителя увеща вопити: / благословен еси, Боже отец наших.

Припев: Дивен Бог во святых Своих, Бог Израилев.

Избавльшиися Твоею кровию мученицы перваго преступления, окропившесе же своею кровию, прообразуют яже Твое заклание, благословен еси, Боже отец наших.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Свирепеющую смерть умертвил еси, Слове Живоначальнейший, в вере же усопшаго (*усопшую*) прими ныне воспевающего и глаголющаго (*воспевающую и глаголющую*), Христе: благословен еси, Боже отец наших.

Слава: Воодушивый мя, человека, вдохновением Божественным Богоначальнейший Владыко, преставленнаго (*преставленную*) Царствия Твоего сподоби, пети Тебе, Спасе: благословен еси, Боже отец наших.

И ныне: Превышши всякия твари, Пренепорочная, была еси, заченши Бога, сокрушившаго смертная врата и верей стершаго: темже Тя, Чистая, песнословим вернии, яко Богоматерь.

Песнь 8

Ирмос: Из пламене преподобным росу источил еси / и праведнаго жертву водою попалил еси: / вся бо твориши, Христе, токмо еже хотети. / Тя превозносим во вся веки.

Припев: Дивен Бог во святых Своих, Бог Израилев.

Крепко подвиги показавше, победы венцем украсистесе мученицы Христовы стратотерпцы, зовуще: Тя превозносим, Христе, во веки.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Священне житие оставльшия верныя, и к Тебе, Владыце, прешедшия, прими кротце упокоевая, яко Благоутробен, Тя превозносящия во вся веки.

Слава: Ныне в земли кротких вся водворятися прежде усопшия, Спасе, благоизволи, верую яже в Тя оправдав и благодатию, Тя превозносящия во вся веки.

И ныне: Все Тя блажим, Всеблаженная, рождшую Слова воистинну сущаго Блаженнаго, плоть нас ради бывшаго; Егоже превозносим во вся веки.

Песнь 9

Ирмос: Бога человеком невозможно видети, / на Него же не смеют чини ангельстии взирати: / Тобою бо, Всечистая, явися человеком / Слово воплощено, Егоже величающе, / с небесными вои // Тя ублажаем.

Припев: Дивен Бог во святых Своих, Бог Израилев.

Надежда мучеников лики укрепи, и к Твоей любви распаленне впери будущих сим предвообразивши непоколебимый воистинну покой; емуже преставльшагося (*преставльшуюся*), Блаже, вернаго (*верную*) сподоби получитьи.

Припев: Покой, Господи, душу усопшаго раба Твоего (Покой, Господи, душу усопшия рабы Твоея).

Светлаго и Божественнаго получитьи сияния Твоего, Христе, верою преставльшагося (*преставльшуюся*) благоволи в недрах Авраамовых упокоение, яко Един Милостив сему (*сей*) даруяй, и вечнаго сподобляяй блаженства.

Слава: Сый естеством благ и благоутробен, и волитель милости и благоутробия бездна; егоже (*юже*) от места сего озлобления и сени смертныя, Спасе, преставил еси, идеже сияет Твой свет, сего (*сию*) учини.

И ныне: Сень святую, Чистая, разумею, и ковчег, и скрижаль Тя закона и благодати; Тобою бо оставление даровася, оправданным кровию Воплощеннаго из Твоего Чрева, Всенепорочная.

Х: Господи, помилуй (12 раз). Господи, Иисусе Христе, Сыне Божий, помилуй нас, грешных.

С: «Помяни, Господи, Боже наш...» или «Боже духов и всякия плоти...»

Х: Аминь.

Самогласны святого Иоанна Дамаскина¹⁴

Глас 1: Кая житейская сладость / пребывает печали непричастна? / Кая ли слава стоит на земли непреложна? / Вся сени немощнейша, вся соний прелестнейша: / едином мгновением, и вся сия смерть приемлет. / Но во свете, Христе, лица Твоего / и в наслаждении Твоя красота, / егоже (*юже*) избрал еси, упокой, яко Человеколюбец.

Глас 2: Увы мне, яковый подвиг имать душа разлучающися от телесе! / Увы, тогда колико слезит и несть помилуяй ю! / Ко Ангелом очи возводящи, бездельно молится: / к человеком руке простирающа, не имать помогающаго. / Темже, возлюбленнии мои братие, / помысливше нашу краткую жизнь, / преставленному (*преставленной*) упокоения от Христа просим, / и душам нашим велию милость.

Глас 3: Вся суета человеческая, / елика не пребывают по смерти; / не пребывает богатство, ни шествует слава; / пришедшей бо смерти, сия вся потребишася. / Темже Христу безсмертному возопиим: / преставленнаго (*преставленную*) от нас упокой, / идеже всех есть веселящихся жилище.

¹⁴ На практике поется только стихира восьмого гласа.

Глас 4: Где есть мирское пристрастие? / Где есть привременных мечтание? / Где есть злато и серебро? / Где есть рабов множество и молва? / Вся персть, вся пепел, вся сень. / Но приидите возопиим безсмертному Царю: / Господи, вечных Твоих благ сподоби преставльшагося (*преставльшуюся*) от нас, / упокоя его (*ю*) в нестареющем блаженстве Твоем.

Глас 5: Помянух пророка вопиюща: / аз есмь земля и пепел, / и паки рассмотрюх во гробех, / и видех кости обнажены, и рех: / убо кто есть царь, или воин, / или богат, или убог, / или праведник, или грешник? / Но упокой, Господи, / с праведными раба Твоего (*рабу Твою*).

Глас 6: Начаток мне и состав зиждительное Твое бысть повеление: / восхотев бо от невидимаго же и видимаго жива мя составити естества. / От земли тело мое создал еси, / дал же ми еси душу / Божественным Твоим и животворящим вдохновением. / Темже, Христе, раба Твоего (*рабу Твою*) во стране живущих, / и в селениях праведных упокой.

Глас 7: По образу Твоему и по подобию создавый в начале человека, / в рай поставил еси владети Твоими тварьми; / завистию же диаволею прельстився, снеди причастися, / заповедей Твоих преступник быв. / Темже паки в землю, от неяже взят бысть, / осудил еси возвратитися, Господи, / и испросити упокоение.

Глас 8: Плачу и рыдаю, / егда помышляю смерть, / и вижу во гробех лежащую / по образу Божию созданную нашу красоту, / безобразну, безславну, / не имущую вида. / О, чудесе! / Что сие еже о нас бысть таинство? / Како предахомся тлению? / Како сопрягохомся смерти? / Воистинну Бога повелением, / якоже писано есть, / подающаго преставльшемуся (*преставльшейся*) упокоение.

Заповеди блаженства, глас 6¹⁵

Во Царствии Твоем помяни нас, Господи, / егда приидеши, во Царствии Твоем.

Блажени нищии духом, / яко тех есть Царство Небесное.

Блажени плачущии, / яко тии утешатся.

Блажени кротции, / яко тии наследят землю.

Блажени алчущии и жаждущии правды, / яко тии насытятся.

Блажени милостивии, / яко тии помиловани будут.

Тропарь: Разбойника рая, Христе, жителя, / на Кресте Тебе возопивша, помяни мя, / председеал еси покаянием его, / и мене сподоби недостойнаго.

Блажени чистии сердцем, / яко тии Бога узрят.

Тропарь: Животом господствуй и смертию, / во дворех святых упокой, / егоже (*юже*) приял еси от привременных; / и помяни мя, егда приидеши во Царствии Твоем.

Блажени миротворцы, / яко тии сынове Божии нарекутся.

¹⁵ Могут и пропеваться, и читаться.

Тропарь: Душами владычествуяй и телесами, / Егоже в руце дыхание наше, / оскорбляемых утешение, / упокой во стране праведных, / егоже *(юже)* преставил еси раба Твоего *(рабу Твою)*.

Блажени изгнани правды ради, / яко тех есть Царство Небесное.

Тропарь: Христос Тя упокоит во стране живущих, / и врата райская да отверзет ти, / и Царствия покажет жителя, / и оставление тебе даст, / о нихже согрешил еси *(согрешила еси)* в житии, христоролюбче *(христоролюбце)*.

Блажени есте, егда поносят вам, / и изженут, и рекут всяк зол глагол на вы, лжуще Мене ради.

Тропарь: Изыдем и узрим во гробех, / яко наги кости человек, / червей снеть и смрад, / и познаем что богатство, доброта, крепость, благолепие.

Радуйтесь и веселитесь, / яко мзда ваша многа на Небесех.

Тропарь: Услышим, что зовет Вседержитель: / увы ищущим зрети страшный день Господень! / Сей бо есть тьма: / огнем бо искушаются всяческая.

Слава: Безначальным и рождением же и происхождением, / Отцу покланяюся родившему, / Сына славлю рожденного, / пою сопросиявшего Отцу же и Сыну, Духа Святаго.

И ныне: Како от сосцу Твоею млеко точиши Дево? / Како питаеши Питателя твари? / Якоже весть, источивый воду от камене, / жилы водныя жаждущим людем, якоже писася.

Ч: Прокимен, глас 6: Блажен путь, воньже идеши днесь, душе, / яко уготовася тебе место упокоения.

Х: Блажен путь, воньже идеши днесь, душе, / яко уготовася тебе место упокоения.

Ч (стих): К Тебе, Господи, воззову, Боже мой, да не премолчиши от мене.

Х: Блажен путь, воньже идеши днесь, душе, / яко уготовася тебе место упокоения.

Ч: Блажен путь, воньже идеши днесь, душе.

Х: Яко уготовася тебе место упокоения.

Ч: К Солуняном послания святаго апостола Павла чтение

Братие, не хочу вас неведети о умерших, да не скорбите, якоже и прочии не имущии упования. Аще бо веруем, яко Иисус умре и воскрес, тако и Бог умершия во Иисусе приведет с Нем. Сие бо вам глаголем словом Господним, яко мы живущии, оставшии в пришествие Господне, не имамы предварити умерших. Яко Сам Господь в повелении, во гласе Архангелове и в трубе Божии снидет с небесе, и мертвии о Христе воскреснут первее. Потом же мы, живущии оставшии, купно с ними восхищени будем на облацех в сретение Господне на воздухе, и тако всегда с Господем будем.

Аллилуиа, глас б: Аллилуиа, Аллилуиа, Аллилуиа.

Х: Аллилуиа, Аллилуиа, Аллилуиа.

Ч (стих): Блажен, егоже избрал и приял еси, Господи.

Х: Блажен, егоже избрал и приял еси, Господи.

С: От Иоанна Святаго Евангелия чтение.

Х: Слава Тебе, Господи, слава Тебе.

С: Рече Господь ко пришедшим к Нему иудеем: аминь, аминь глаголю вам, яко слушаешь словесе Моего и веруешь Послававшему Мя, имать живот вечный, и на суд не придет, но преидет от смерти в живот. Аминь, аминь глаголю вам, яко грядет час, и ныне есть, егда мертвии услышат глас Сына Божия, и услышавше оживут. Якоже бо Отец имать живот в Себе, тако даст и Сынови живот имети в Себе. И область даст Ему и суд творити, яко Сын Человечь есть, не дивитесь сему. Яко грядет час, вонже вси сущии во гробех услышат глас Сына Божия, и изыдут сотворшии благая в воскрешение живота, а сотворшии злая в воскрешение суда. Не могу Аз о Себе творити ничесоже. Якоже слышу, сужду, и суд Мой праведен есть, яко не ищу воли Моея, но воли пославшаго Мя Отца.

Х: Слава Тебе, Господи, слава Тебе.

Господи, помилуй (12 раз). Господи, Иисусе Христе, Сыне Божий, помилуй нас, грешных.

С: «Помяни, Господи, Боже наш...» или «Боже духов и всякия плоти...»

Х: Аминь.

Стихиры на последнее целование, глас 2 (подобен «Егда от древа»)¹⁶

Приидите, последнее целование / дадим, братие, умершему (*умершей*), / благодаряще Бога: / сей (*сия*) бо оскуде от сродства своего, / и ко гробу тщится не ктому пекийся (*пекущийся*) / о суетных, и о многострастной плоти. / Где ныне сродницы же и друзи? / Се разлучаемся. / Егоже (*юже*) упокоити, Господу помолимся.

Кое разлучение, о братие? Кий плачь? / Кое рыдание в настоящем часе? / Приидите убо, целуйте бывшего (*бывшую*) в мале с нами; / предается ко гробу, / камнем покрывается, / во тьму вселяется, / с мертвыми погребается, / и всех сродников и друзей ныне разлучается. / Егоже (*юже*) упокоити, Господу помолимся.

Ныне житейское лукавое разрушается торжество суеты: / дух бо оскуде от селения, брение очернися, / сосуд раздрася, безгласен, нечувствен, мертвен, недвижимь. / Егоже (*юже*) посылающе гробу, Господу помолимся, / дати сему (*сей*) во веки упокоение.

Яков живот наш есть? Цвет и дым, и роса утренняя воистинну. / Приидите убо, узрим на гробех ясно, где доброта телесная? / Где юность? Где суть очеса и зрак

¹⁶ Поется во время прощания всех присутствующих с усопшим.

плотский? / Вся увядоша яко трава, вся потребишася, / приидите ко Христу припадем со слезами.

Велий плачь и рыдание, велие въздыхание и нужда, / разлучение души, ад и погибель, / привременный живот, сень непостоянная, / сон прелестный, безвременномечтанен труд жития земнаго. / Далече отбежим мирскаго всякаго греха, да небесная наследим.

Видяще предлежаща мертва, / образ восприимем вси конечнаго часа: / сей бо отходит яко дым от земли, / яко цвет отцвете, / яко трава посечесе, / вретищем повиваемь, / землю покрываемь. / Егоже невидима оставивше, Христу помолимся, / дати сему (*сей*) во веки упокоение.

Приидите, внуцы Адамовы, увидим на земли поверженнаго, / по образу нашему все благолепие отлагающа, / разрушена во гробе гноем, червми, тьмою иждиваема, землю покрываема. / Егоже невидима оставльше, Христу помолимся, / дати во веки (*сей*) упокоение.

Егда душа от тела имать нуждею восхититися страшными Ангелы, / всех забывает сродников и знаемых, / и печется о будущих судилищех стоянии, яже суеты и многотрудныя плоти разрешении; / тогда Судию моляще, вси помолимся, / да простит Господь, яже содела.

Приидите, братие, во гробе узрим пепел и персть, из неяже создахомся. / Камо ныне идем? Что же быхом? / Кий убог или богат? Или кий владыка? / Кий же свобод? И не вси ли пепел? / Доброта лица согни и юности весь цвет увяди смерть.

Воистинну суета и тление, / вся житейская виды и безславная; / вси бо исчезаем, вси умрем, / царие же и князи, / судии и насильницы, / богатии и убозии, / и все естество человеческое; / ныне бо, иже иногда в житии, во гробы ввергаются, / ихже да упокоит Господь, помолимся.

Вси телеснии ныне органы праздни зрятся, / иже прежде мало движими бяху, / вси недействительны, мертвы, нечувственны: / очи бо заидоша, связастеся нозе, / руце безмолвствуете и слух с ними, / язык молчанием заключися, гробу предается. / Воистинну суета вся человеческая.

Спасай надеющихся на тя, / Мати незаходимаго солнца, Богородительнице, / умоли молитвами Твоими преблагаго Бога / упокоити, молимся, ныне преставльшагося (*преставльшуюся*), / идеже упокоеваются праведных души, / Божественных благ наследника покажи, / во дворех праведных, / в память, Всенепорочная, вечную.

Слава, глас 6: Зряще мя безгласна (*безгласну*) / и бездыханна предлежаща (*бездыханну предлежащу*) / восплачите о мне братие и друзи, / сродницы и знаемии: / вчерашний бо день беседовах с вами / и внезапно найде на мя страшный час смертный. / Но приидите вси любящии мя / и целуйте мя последним целованием. / Не ктому бо с вами похожду, / или собеседую прочее, / к Судии бо отхожду, / идеже несть лицепрятия: / раб бо и владыка вкупе предстоят, / царь и воин, богатый и убогий / в равнем достоинстве; / кийждо бо от своих дел / или прославится, или постыдится. / Но

прошу всех и молю, / непрестанно о мне молитесь Христу Богу, / да не низведен буду *(да не низведена буду)* по грехом моим, / на место мучения, / но да вчинит мя, идеже свет животный.

И ныне, глас тойже: Молитвами рождшия Тя, Христе, / и Предтечи Твоего, / Апостолов, пророков, иерархов, / преподобных, и праведных, и всех святых, / усопшаго раба Твоего *(усопшую рабу Твою)* упокой.

Ч: Трисвятое по Отче наш.

С: Молитвами святых отец наших...

Х: Аминь.

Тропари заупокойные, глас 4

Со духи праведных скончавшихся / душу раба Твоего *(рабы Твоея)*, Спасе, упокой, // сохраняя его *(ея)* во блаженной жизни, яже у Тебе, Человеколюбче.

В покоищи Твоем, Господи, / идеже вси святии Твои упокоеваются, / упокой и душу раба Твоего *(рабы Твоея)*, / яко Един еси Человеколюбец.

Слава Отцу и Сыну и Святому Духу.

Ты еси Бог, сошедый во ад и узы окованных разрешивый, / Сам и душу раба Твоего *(рабы Твоея)* упокой.

И ныне и присно и во веки веков. Аминь.

Едина Чистая и Непорочная Дева, Бога без семени рождшая, / моли спастися души его *(ея)*.

Господи, помилуй (12 раз). Господи, Иисусе Христе, Сыне Божий, помилуй нас, грешных.

С: «Помяни, Господи, Боже наш...» или «Боже духов и всякия плоти...».

Х: Аминь. Честнейшую Херувим и славнейшую без сравнения Серафим, / без истления Бога Слова рождшую Тя величаем.

Слава, и ныне. Господи, помилуй (трижды). Господи, благослови.

С. лицом к народу перед гробом говорит отпуст: Живыми и мертвыми обладай, воскресый из мертвых Господи Иисусе Христе, Сыне Божий, молитвами Пречистыя Твоея Матере, преподобных и богоносных отец наших и всех святых, помилуй и упокой душу раба Твоего *(рабы Твоея)* *(имя)* и всех православных христиан в безконечныя веки, яко Благ и Человеколюбец.

Х: Аминь.

С: Во блаженном успении вечный покой подаждь, Господи, усопшему рабу Твоему *(усопшей рабе Твоей)* *(имя)*, и сотвори ему *(ей)* вечную память.

Х: Вечная память (трижды)¹⁷. Душа его во благих водворится и память его в род и род (*Душа ея во благих водворится и память ея в род и род*).

Святой Боже, Святой Крепкий, Святой Безсмертный, помилуй нас!
(поется все время, пока гроб несут до места погребения усопшего)

Далее под пение Трисвятого гроб выносится из храма (часовни или моленного дома) и обносится крестным ходом вокруг, а затем относится на место своего погребения. Во время опускания гроба и засыпания его землей, хор поет заупокойные тропари «Со духи праведных скончавшихся...» и прочие.

Увещевание! Миряне разрешительную молитву, которая читается только переем, совершать не могут. В таком случае общине нужно дожидаться священника, который по своем пришествии совершит над захоронением усопшего заупокойную литию, а после нее прочитает разрешительную молитву.

Чинопоследование отпевания, совершаемое мирянином в Светлую Седмицу

На Светлой седмице Чин отпевания отличается от последования, который совершается в обычные дни: имеет свои чтения и песнопения.

Чинопоследование отпевания не совершается в сам день Светлого Христова Воскресения, поэтому заупокойное богослужение и погребение переносится либо на Великую Субботу, либо на Светлый понедельник.

С: Молитвами святых отец наших...

Х: Аминь.

Тропарь Пасхи, глас 5

Христос воскрес из мертвых, / смертью смерть поправ / и сущим во гробех живот даровав (трижды).

С (стих): Да воскреснет Бог и расточатся врази Его¹⁸.

Х: Тропарь Пасхи.

С (стих): Яко исчезает дым, да исчезнут, яко тает воск от лица огня.

Х: Тропарь Пасхи.

С (стих): Тако да погибнут грешницы от Лица Божия, а праведницы да возвеселятся.

Х: Тропарь Пасхи.

¹⁷ Старший совершает малое каждение.

¹⁸ Совершается на каждый стих каждение гроба с четырех сторон. На «Славу» совершается обычное малое каждение.

С (стих): Сей день, егоже сотвори Господь, возрадуемся и возвеселимся в онь.

Х: Тропарь Пасхи.

С: Слава Отцу и Сыну и Святому Духу.

Х: Тропарь Пасхи.

С: И ныне и присно, и во веки веков. Аминь.

Х: Тропарь Пасхи.

Старший всех приветствует: «Христос воскресе», а народ отвечают: «Воистину воскресе».

Х: Господи, помилуй (12 раз). Господи, Иисусе Христе, Сыне Божий, помилуй нас грешных.

С: Помяни, Господи Боже наш, в вере и надежди живота вечнаго усопших раб Твоих (*усопшаго раба Твоего или усопшия рабы Твоея*) (**имена**), и яко Благ и Человеколюбец, отпускай грехи и потребляяй неправды, ослаби, остави и прости вся вольная их (*его или ея*) согрешения и невольная, возставляя их (*его или ея*) во Святое Второе Пришествие Твое в причастие вечных Твоих благ, ихже ради в Тя Единого верова, Истиннаго Бога и Человеколюбца, яко Ты еси воскресение и живот, и покой рабам Твоим (*рабу Твоему или рабе Твоей*) (**имена**), Христе Боже наш, и Тебе славу возсылаем, со безначальным Твоим Отцем, и с Пресвятым Духом, ныне и присно и во веки веков.

[Возможно чтение иной молитвы Старшим:

Боже духов и всякия плоти, смерть поправый и диавола упразднивый, и живот миру Твоему даровавый! Сам Господи, упокой души усопших рабов Твоих (*душу усопшего раба Твоего или душу усопшия рабы Твоея*) (**имена**), в месте светле, в месте злачне, в месте покойне, отнюдуже отбеже болезнь, печаль и воздыхание. Всякое согрешение, содеянное ими (*им или ею*), словом, или делом, или помышлением, яко Благий Человеколюбец Бог прости, яко несть человек, иже жив будет и не согрешит, Ты бо един, кроме греха, правда Твоя правда во веки, и слово Твое истина. Яко Ты еси воскресение, жизнь и покой души усопших раб Твоих (*души усопшего раба Твоего или усопшия рабы Твоея*) (**имена**), Христе Боже наш, и Тебе славу возсылаем, со Безначальным Твоим Отцем и Пресвятым и Благим и Животворящим Твоим Духом, ныне и присно и во веки веков¹⁹.]

Х: Аминь.

Канон Пасхи, глас 1

Песнь 1

Ирмос: Воскресения день, / просветимся, людие. / Пасха, Господня Пасха: / от смерти бо к жизни, / и от земли к небеси, / Христос Бог нас преведе, / победную поюция.

¹⁹ См. сноску

Припев: Христос воскрес из мертвых.

Очистим чувства, и узрим / неприступным светом / Воскресения, Христа / блистающая, / и радуйтесь, рекуща, / ясно да услышим, / победную поюще.

Припев: Христос воскрес из мертвых.

Небеса убо достойно да веселятся, / земля же да радуется, / да празднует же мир, / видимый же весь и невидимый: / Христос бо воста, / веселие вечное.

Припев: Пресвятая Богородице, спаси нас.

Умерщвления предел сломила еси, вечную жизнь рождающая Христа, из гроба возсиявшего днесь, Дево Всенепорочная, и мир просветившего.

Припев: Пресвятая Богородице, спаси нас.

Воскресшего видевши Сына Твоего и Бога, радуйся со апостолы, Богоблагодатная Чистая: и еже радуйся первее, яко всех радости вина, восприяла еси, Богомати Всенепорочная.

Слава Отцу и Сыну и Святому Духу, / и ныне и присно, и во веки веков. Аминь.

Песнь 3

Ирмос: Приидите, пиво прием новое, / не от камени неплодна чудодеемое, / но нетления источник, / из гроба одождивша Христа, // в Немже утверждаемся.

Припев: Христос воскрес из мертвых.

Ныне вся исполнишася света, / Небо же и земля и преисподняя: / да празднует убо вся тварь / востание Христово, // в Немже утверждается.

Припев: Христос воскрес из мертвых.

Вчера спогребохся Тебе, Христе, / совостаю днесь воскресшу Тебе, / сраспинахся Тебе вчера, / Сам мя спрослави, Спасе, // во Царствии Твоем.

Припев: Пресвятая Богородице, спаси нас.

На нетленную жизнь прихожду днесь, / благостию Рождаемого из Тебе, Чистая, // и всем концем свет облиставшего.

Припев: Пресвятая Богородице, спаси нас.

Бога, Егоже родила еси плотию, из мертвых, / якоже рече, воставша видевши, / Чистая, ликуй, / и Сего яко Бога, // Пречистая, возвеличай.

Слава Отцу и Сыну и Святому Духу, / и ныне и присно, и во веки веков. Аминь.

Х: Господи, помилуй (12 раз). Господи, Иисусе Христе, Сыне Божий, помилуй нас грешных.

С: «Помяни, Господи Боже наш...» или «Боже духов и всякия плоти...»

Х: Аминь.

Ипакои, глас 4:

Предварившия утро яже о Марии, / и обретшия камень отвален от гроба, / слышаху от Ангела: / во свете присносущем Сущаго, с мертвыми что ищите, яко человека? / Видите гробныя пелены, тецыте, и миру проповедите, / яко воста Господь, умертвивый смерть, // яко есть Сын Бога, спасающаго род человеческий.

Песнь 4

Ирмос: На Божественной стражи, / богоглаголивый Аввакум да станет с нами и покажет светоносна ангела, / ясно глаголюща: / днесь спасение миру, / яко воскресе Христос, // яко Всесилен.

Припев: Христос воскресе из мертвых.

Мужеский убо пол, / яко разверзый девственную утробу, / явися Христос: / яко человек же, Агнец наречеса: / непорочен же, яко невкусен скверны, / наша Пасха, // и яко Бог истинен совершен речеса.

Припев: Христос воскресе из мертвых.

Яко единолетний агнец, / благословенный нам венец Христос, / волею за всех заклан бысть, / Пасха очистительная, / и паки из гроба красное правды нам возсия Солнце.

Припев: Христос воскресе из мертвых.

Богоотец убо Давид, / пред санным ковчегом скакаше играя, / людие же Божии святии, / образов сбытие зряще, / веселимся божественне, / яко воскресе Христос, // яко всесилен.

Припев: Пресвятая Богородице, спаси нас.

Создавый Адама, Твоего праотца, Чистая, / зиждется от Тебе, / и смертное жилище разори Своею смертию днесь, / и озари вся Божественными блистаньями Воскресения.

Припев: Пресвятая Богородице, спаси нас.

Егоже родила еси Христа, / прекрасно из мертвых возсиявша, / Чистая, зрящи, добрая и непорочная в женах / и красная, днесь во спасение всех, / со апостолы радующися, // Того прославляй.

Слава Отцу и Сыну и Святому Духу, / и ныне и присно, и во веки веков. Аминь.

Песнь 5

Ирмос: Утренюем утреннюю глубоку, / и вместо мира песнь принесем Владыце, / и Христа узрим, / Правды Солнце, // всем жизнь возсияюща.

Припев: Христос воскресе из мертвых.

Безмерное Твое благоутробие адовыми узами содержимии зряще, / к свету идяху Христе, / веселыми ногами, / Пасху хваляще вечную.

Припев: Христос воскрес из мертвых.

Приступим, священоснии, / исходящу Христу из гроба яко жениху, / и спразднуим любопрзднственными чинми Пасху Божию // спасительную.

Припев: Пресвятая Богородице, спаси нас.

Просвещается Божественными лучами и живоносными / воскресения Сына Твоего, / Богомати Пречистая, / и радости исполняется благочестивых собрание.

Припев: Пресвятая Богородице, спаси нас.

Не разверзл еси врата девства в воплощении, / гроба не разрушил еси печатей, / Царю создания: / отонудуже воскресшаго Тя зрящи, Мати радовашеся.

Слава Отцу и Сыну и Святому Духу, / и ныне и присно, и во веки веков. Аминь.

Песнь 6

Ирмос: Снизшел еси в преисподняя земли / и сокрушил еси верей вечныя, / содержащая связанна Христе, / и тридневен, яко от кита Иона, // воскресл еси от гроба.

Припев: Христос воскрес из мертвых.

Сохранив цела знамения, Христе, / воскресл еси от гроба, / ключи Девы невреdivый в рождестве Твоем, // и отверзл еси нам райския двери.

Припев: Христос воскрес из мертвых.

Спасе мой, живое же и нежертвенное заклание, / яко Бог Сам Себе волею привел Отцу, / совоскресил еси всероднаго Адама, / воскрес от гроба.

Припев: Пресвятая Богородице, спаси нас.

Возведесе древле держимое смертию и тлением, / Воплотившимся от Твоего Пречистаго чрева, / к нетленной и присносущней жизни, / Богородице Дево.

Припев: Пресвятая Богородице, спаси нас.

Сниде в преисподняя земли, / в ложесна Твоя, Чистая, сшедый, / и вселивыйся и воплотивыйся паче ума, / и воздвиже с Собою Адама, // воскрес от гроба.

Слава Отцу и Сыну и Святому Духу, / и ныне и присно, и во веки веков. Аминь.

Х: Господи, помилуй (12 раз). Господи, Иисусе Христе, Сыне Божий, помилуй нас грешных.

С: «Помяни, Господи Боже наш...» или «Боже духов и всякия плоти...»

Х: Аминь.

Кондак, глас 8

Со святыми упокой, / Христе, душу раба Твоего (или рабы Твоя), / идеже несть болезнь, ни печаль, / ни воздыхание, // но жизнь безконечная.

Кондак, глас 8

Аще и во гроб снизшел еси, Безсмертне, / но адову разрушил еси силу, / и воскресл еси яко победитель, Христе Боже, / женам мироносицам вещавый: радуйтесь, / и Твоим апостолом мир даруяй, // падшим подай воскресение.

Елицы во Христа креститесь, / во Христа облекостесь: // Аллилуиа.

Чтение Апостола

В понедельник Светлой седмицы

Прокимен, глас 8: Во всю землю изыде вещание их, / и в концы вселенных глаголы их.

Стих: Небеса поведают славу Божию, творение же руку Его возвещает твердь.

Деяний святых Апостол чтение

Во дни оны, возвратишася апостоли во Иерусалим от горы нарицаемая Елеон, яже есть близ Иерусалима, субботы имущия путь. И егда внидоша, взыдоша на горницу, идеже бяху пребывающе, Петр же и Иаков, и Иоанн и Андрей, Филипп и Фома, Варфоломей и Матфей, Иаков Алфеов и Симон Зилот и Иуда Иаковль. Сии вси бяху терпяще единомудушно в молитве и молении, с женами и Марию Материю Иисусовою и с братиею Его. И во дни тья востав Петр посреде ученик, рече, бе же имен народа вкупе яко сто и двадесять: мужие братие, подобаше скончати Писанию сему, еже предрече Дух Святыи усты Давидовыми о Иуде, бывшем вожди емшим Иисуса, яко причтен бе с нами и приял бяше жребий службы сея, подобает убо от сходящихся с нами мужей во всяко лето, в неже вниде и изыде в нас Господь Иисус, начен от крещения Иоаннова даже до дне, в онъже вознесся на небо от нас, свидетелю воскресения Его быти с нами единому от сих. И поставиша два, Иосифа нарицаемаго Варсаву, иже наречен бысть Иуст, и Матфия, и помолившеся реща: Ты, Господи, Сердцеведче всех, покажи, егоже избрал еси от сею двою одинаго, прияти жребий служения сего и апостольства, из негоже испаде Иуда, ити в место свое. И даша жребия има, и паде жребий на Матфия, и причтен бысть ко единонадесяти апостолом.

(Зачало 2)

Во вторник Светлой седмицы

Прокимен, глас 3. Песнь Богородицы: Величит душа Моя Господа, / и возрадовася дух Мой о Бозе, Спасе Моем.

Стих: Яко призре на смирение рабы Своя: се бо от ныне ублажат Мя вси роди.

Деяний святых Апостол чтение

Во дни оны, став Петр со единонадесятьми, воздвиже глас свой и рече им: мужие Иудейстии и живуции во Иерусалиме вси, сие вам разумно да будет, и внушите глаголы моя, не бо, якоже вы нещуете, сии пияни суть, есть бо час третий дне, но сие есть реченное пророком Иоилем: и будет в последния дни, глаголет Господь, излию от Духа Моего на всяку плоть, и прорекут сынове ваши и дщери ваша, и юноши ваши видения узрят, и старцы ваши сония видят, ибо на рабы Моя и на

рабыни Моя во дни оны излию от Духа Моего, и прорекут, и дам чудеса на небеси горе и знамения на земли низу, кровь и огонь и курение дыма. Солнце преложится во тьму, и луна в кровь, прежде даже не приити дню Господню великому и просвещенному. И будет, всяк, иже аще призовет имя Господне, спасется. **Зачало 4**

В среду Светлой седмицы

Прокимен, глас 6: Помяну имя Твое / во всяком роде и роде.

Стих: Слыши, Дщи, и виждь, и приклони ухо Твое.

Деяний святых Апостол чтение

Во дни оны, рече Петр к людем: мужие Израильстии, послушайте словес сих: Иисуса Назореа, Мужа от Бога извествовавна в вас силами и чудесы и знамении, яже сотвори Тем Бог посреде вас, якоже и сами весте, Сего нарекованным советом и проразумением Божиим предана приемше, руками беззаконных пригвождше убисте: Егоже Бог воскреси, разрешив болезни смертныя, якоже не бяше мощно держиму быти Ему от нея. Давид бо глаголет о Нем: предзрех Господа предо мною выну, яко одесную мене есть, да не подвижуся: сего ради возвеселися сердце мое, и возрадовася язык мой: еще же и плоть моя вселится на уповании, яко не оставиши души моея во аде, ниже даси преподобному Твоему видети истления: сказал ми еси пути живота: исполниши мя веселия с лицом Твоим. Мужие братие, достоин рещи с дерзновением к вам о патриарсе Давиде, яко и умре и погребен бысть, и гроб его есть в нас даже до дне сего: пророк убо сый и ведый, яко клятвою клятеся ему Бог от плода чресл его по плоти воздвигнути Христа и посадити Его на престоле его, предвидев глагола о воскресении Христове, яко не оставися душа Его во аде, ни плоть Его виде истления. Сего Иисуса воскреси Бог, емуже вси мы есмы свидетелие. Десницею убо Божиею вознесся, и обетование Святаго Духа приемь от Отца, излия сие, еже вы ныне видите и слышите. Не бо Давид взыде на небеса, глаголет бо сам: рече Господь Господеви моему: седи одесную Мене, дондеже положу враги Твоя подножие ног Твоих. Твердо убо да разумеет весь дом Израилев, яко и Господа и Христа его Бог сотворил есть, Сего Иисуса, Егоже вы распясте. **Зачало 5**

В четверг Светлой седмицы

Прокимен, глас 3: Пойте Богу нашему, пойте, / пойте Цареву нашему, пойте.

Стих: Все языцы воспещите руками, воскликните Богу гласом радования.

Деяний святых Апостол чтение

Во дни оны, рече Петр к людем: покайтесь, и да крестится кийждо вас во имя Иисуса Христа во оставление грехов, и примете дар Святаго Духа. Вам бо есть обетование и чадом вашим и всем дальним, елики аще призовет Господь Бог наш. И иными словесы множайшими засвидетельствоваше и моляше я, глаголя: спаситесь от рода строптиваго сего. Уже убо любезно прияша слово его, крестишася, и приложишася в день той душ яко три тысяцы. Бяху же терпяще во учении Апостол и во общении и в преломлении хлеба и в молитвах. Бысть же на всякой души страх: многа бо чудеса и знамения Апостолы быша во Иерусалиме. **Зачало 6**

В пятницу Светлой седмицы

Прокимен, глас 8: Во всю землю изыде вещание их, / и в концы вселенных глаголы их.

Стих: Небеса поведают славу Божию, творение же руку Его возвещает твердь.

Деяний святых Апостол чтение

Во дни оны, вкупе Петр и Иоанн восхождаста во святилище на молитву в час девятый. И некий муж, хром от чрева матери своей сый, носимъ бываше, егоже полагаху по вся дни пред дверьми церковными, рекомыми Красными, просити милостыни от входящих в церковь. Иже видев Петра и Иоанна хотящия внити в церковь, прошаше милостыни. Возрев же Петр на него со Иоанном, рече: возри на ны. Он же прилежаше к ним, мня нечто от нею прияти. Рече же Петр: сребра и злата несть у мене, но еже имам, сие ти даю, во имя Иисуса Христа Назореа востани и ходи. И емь его за десную руку воздвиже, абие же утвердистесь его плесне и глезне, и вскочив ста и хождаше, и вниде с ними в церковь, ходя и скача и хваля Бога. **(Зачало 7)**

В субботу Светлой седмицы

Прокимен, глас 3: Господь просвещение мое и Спаситель мой, / кого убоюся?

Стих: Господь защититель живота моего, от кого утрашуся?

Деяний святых Апостол чтение

Во дни оны, держащуся исцелевшему хрому Петра и Иоанна, притекоша к ним все люди в притвор, нарицаемый Соломонов, ужасни. Видев же Петр отвещаваше к людем: мужие Израильтяне, что чудитесь о сем, или на ны что взираете, яко своею ли силою или благочестием сотворихом его ходити? Бог Авраамов и Исааков и Иаковль, Бог отец наших, прослави Отрока Своего Иисуса, Егоже вы предасте, и отвергостесь Его пред лицом Пилатовым, суждъшу Ему пустити. Вы же Святаго и Праведнаго отвергостесь, и испросисте мужа убийцу дати вам, Начальника же жизни убисте, Егоже Бог воскресил от мертвых, емуже мы свидетели есмы. И о вере имене Его, сего, егоже видите и знаете, утверди имя Его, и вера, яже Его ради, даде ему всю целость сию пред всеми вами. **(Зачало 8)**

Во все дни седмицы по чтении Апостола:

Ч: Аллилуиа, глас 2: Аллилуиа, Аллилуиа, Аллилуиа.

Х: Аллилуиа, Аллилуиа, Аллилуиа.

Далее читается Святое Евангелие, во все дни зачало одно и то же.

С: От Матфея Святаго Евангелия чтение.

Х: Слава Тебе, Господи, слава Тебе.

С: Во время оно, едининадесять ученицы идоша в Галилею, в гору, аможе повеле им Иисус, и видевшие Его, поклонишася Ему, ови же усумнешася. И приступль Иисус, рече им, глаголя: дадеся Ми всяка власть на небеси и на земли. Шедше убо научите вся языки, крестяще их во имя Отца и Сына и Святаго Духа, учаще их блюсти вся, елика заповедах вам, и се Аз с вами есмь во вся дни до скончания века. Аминь.
(Зачало 116)

Х: Слава Тебе, Господи, слава Тебе.

Воскресение Христово видевшие, / поклонимся Святому Господу Иисусу, / Единому безгрешному, / Кресту Твоему покланяемся, Христе, / и Святое Воскресение Твое поем и славим: / Ты бо еси Бог наш, / разве Тебе иного не знаем, / имя Твое именуем. / Приидите вси вернии, / поклонимся Святому Христову Воскресению: / се, бо прииде Крестом радость всему миру. / Всегда благословяще Господа, / поем воскресение Его: / распятие бо претерпев, / смертью смерть разруши. (единожды)

Воскрес Иисус от гроба, / якоже прорече, / даде нам живот вечный / и велию милость. (единожды)

Песнь 7

Ирмос: Отроки от печи избавивый, / быв человек, / страждет яко смертен, / и страстию смертное в нетления облачит благолепие, / Един благословен отцев Бог, // и препрославлен.

Припев: Христос воскрес из мертвых.

Жены с миры богомудрыя в след Тебе течаху: / Егоже яко мертва со слезами искаху, / поклонишася радующияся Живому Богу, / и Пасху тайную Твоим, Христе, // учеником благовестиша.

Припев: Христос воскрес из мертвых.

Смерти празднуем умерщвление, / адово разрушение, / иного жития вечнаго начало, / и играюще поем Виновнаго, / Единаго благословеннаго отцев Бога // и препрославленнаго.

Припев: Христос воскрес из мертвых.

Яко воистинну священная и всепразднственная, сия спасительная ночь, / и светозарная, / светоноснаго дне, / востания сущи провозвестница: / в нейже безлетный Свет из гроба // плотски всем возсия.

Припев: Пресвятая Богородице, спаси нас.

Умертвив Сын Твой смерть, Всенепорочная, / днешь, всем смертным пребывающий живот / во веки веков дарова, / Един благословенный отцев Бог // и препрославленный.

Припев: Пресвятая Богородице, спаси нас.

Всем царствуяй созданием, / быв человек, / вселися в Твою, Богоблагодатная, утробу, / и распятие претерпев и смерть, / воскресе боголепно, совозставив нас // яко всемоу.

Слава Отцу и Сыну и Святому Духу, / и ныне и присно, и во веки веков. Аминь.

Песнь 8

Ирмос: Сей нареченный и святыи день, / един суббот Царь и Господь, / праздников праздник, / и торжество есть торжеств: // в оньже благословим Христа во веки.

Припев: Христос воскресе из мертвых.

Приидите, новаго винограда рождения, / Божественнаго веселия, / в нарочитом дни Воскресения, / Царствия Христова приобщимся, // поюще Его яко Бога во веки.

Припев: Христос воскресе из мертвых.

Возведи окрест очи твои, Сионе, и виждь: / се бо приидоша к Тебе, / яко богосветлая светила, / от запада, и севера, и моря, / и востока чада твоя, // в тебе благословящая Христа во веки.

Припев (Троицен): Пресвятая Троице Боже наш, слава Тебе.

Отче Вседержителю, и Слове, и Душе, / трети соединяемое во ипостасех Естество, / Пресущественне и Пребожественне, / в Тя крестихомся, // и Тя благословим во вся веки.

Припев: Пресвятая Богородице, спаси нас.

Прииде Тобою в мир Господь, Дево Богородице, / и чрево адово расторг, / смертным нам воскресение дарова: // темже благословим Его во веки.

Припев: Пресвятая Богородице, спаси нас.

Всю низложив смерти державу Сын Твой, Дево, Своим воскресением, / яко Бог крепкий совознесе нас и обожил: // темже воспеваем Его во веки.

Благословим Отца и Сына и Святаго Духа, Господа, / и ныне и присно, и во веки веков. Аминь.

Песнь 9

Ирмос: Светися, светися, / новый Иерусалиме: / слава бо Господня на тебе возсия, / ликуй ныне, и веселися, Сионе! / Ты же, Чистая, красуйся, Богородице, // о востании Рождества Твоего.

Припев: Христос воскресе из мертвых.

О, божественнаго! О, любезнаго! / О, сладчайшаго Твоего гласа! / С нами бо неложно обещался еси быти, / до скончания века, Христе, / Егоже вернии, // утверждение надежды имуще, радуемся.

Припев: Христос воскресе из мертвых.

О, Пасха велия и священнейшая, Христе! / О мудроте, и Слове Божий, и Сило!
/ Подавай нам истее Тебе причащаться, // в невечернем дни Царствия Твоего.

Припев: Пресвятая Богородице, спаси нас.

Согласно, Дево, Тебе блажим вернии: / радуйся, дворе Господня, / радуйся
граде одушевленный; / радуйся, Еяже ради нам ныне возсия свет из Тебе Рожденного //
из мертвых воскресения.

Припев: Пресвятая Богородице, спаси нас.

Веселися и радуйся, Божественная дворе Света: / зашедый бо Иисус во гроб,
возсия, / просияв солнца светлее, / и верныя вся озарив, / Богорадованная Владычице.

Слава Отцу и Сыну и Святому Духу, / и ныне и присно, и во веки веков. Аминь.

Х: Господи, помилуй (12 раз). Господи, Иисусе Христе, Сыне Божий, помилуй
нас грешных.

С: «Помяни, Господи Боже наш...» или «Боже духов и всякия плоти...»

Х: Аминь.

Ексапостиларий Пасхи, самогласен

Плотию уснув, / яко мертв, / Царю и Господи, / тридневен воскресл еси, / Адама
воздвиг от тли, / и упразднил смерть: / Пасха нетления, // мира спасение.

Тропари по Непорочных, глас 5²⁰

Благословен еси Господи, научи мя оправданием Твоим.

Ангельский собор удивися, / зря Тебе в мертвых вменившаяся, / смертную же,
Спасе, крепость разоривша, / и с Собою Адама воздвигша, / и от ада вся свободяща.

Благословен еси Господи, научи мя оправданием Твоим.

Почто мира с милостивными слезами, / о, ученицы, растворяете? / Блистаясь
во гробе Ангел мироносицам вещаше: / видите вы гроб и уразумейте, / Спас бо
воскресе от гроба.

Благословен еси Господи, научи мя оправданием Твоим.

Зело рано мироносицы течаху / ко гробу Твоему рыдающия, / но предста к ним
Ангел и рече: / рыдания время преста, не плачите, / воскресение же апостолом рцыте.

Благословен еси Господи, научи мя оправданием Твоим.

Мироносицы жены с миры пришедшия / ко гробу Твоему, Спасе, рыдаху, /
Ангел же к ним рече, глаголя: / что с мертвыми живаго помышляете? / Яко Бог бо,
воскресе от гроба.

Слава Отцу и Сыну и Святому Духу.

²⁰ Совершается полное каждение.

Поклонимся Отцу / и Его Сынови, и Святому Духу, / Святей Троице во едином существе, / с Серафимы зовуще: / Свят, Свят, Свят еси, Господи.

И ныне и присно, и во веки веков. Аминь.

Жизнодавца рождши, / греха, Дево, Адама избавила еси, / радость же Еве / в печали место подала еси, / падшия же от жизни / к сей направи / из Тебе воплотивыйся Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Стихиры Пасхи, глас 5-й:

Стих: *Да воскреснет Бог, и расточатся врази Его.*

Пасха священная нам днесь показася: / Пасха нова святая, / Пасха таинственная, / Пасха всечестная, / Пасха Христос Избавитель: / Пасха непорочная, / Пасха великая, / Пасха верных, / Пасха, двери райския нам отверзающая, // Пасха всех освящающая верных.

Стих: *Яко исчезает дым, да исчезнут.*

Приидите от видения жены благовестницы, / и Сиону рцыте: / прими от нас радости благовещения Воскресения Христова; / красуйся, ликуй / и радуйся, Иерусалиме, / Царя Христа узрев из гроба, // яко жениха происходяща.

Стих: *Тако да погибнут грешницы от лица Божия, а праведницы да возвеселятся.*

Мироносицы жены, / утра глубоко, / представша гробу Живодавца, / обретоша Ангела, на камени сидяща, / и той провещав им, / сице глаголаше: / что ищете живаго с мертвыми? / Что плачете Нетленного во тли? // Шедше проповедите учеником Его.

Стих: *Сей день, егоже сотвори Господь, возрадуемся и возвеселимся в оны.*

Пасха красная, / Пасха, Господня Пасха! / Пасха всечестная / нам возсия. / Пасха! / Радостию друг друга обыдем. / О Пасха! / Избавление скорби, / ибо из гроба днесь / яко от чертога возсияв Христос, / жены радости исполни, глаголя: // проповедите апостолом.

Слава Отцу и Сыну и Святому Духу. И ныне и присно и во веки веков. Аминь.

Воскресения день, / и просветимся торжеством, / и друг друга обыдем. / Рцем, братие, / и ненавидящим нас, простим вся воскресением, / и тако возопиим: / Христос воскрес из мертвых, / смертию смерть поправ, / и сущим во гробех живот даровав.

Далее совершается целование усопшего, в течение которого хор поет тропарь Пасхи «Христос воскрес из мертвых...». По окончании:

Х: Господи, помилуй (12 раз). Господи, Иисусе Христе, Сыне Божий, помилуй нас грешных.

С: «Помяни, Господи Боже наш...» или «Боже духов и всякия плоти...»

Х: Аминь.

Честнейшую Херувим и славнейшую без сравнения Серафим, / без исления Бога Слова рождшую, сущую Богородицу, Тя величаем.

Слава, и ныне. Господи, помилуй (трижды). Господи, благослови.

С. говорит отпуст лицом к народу: Воскресый из мертвых, смертью смерть поправый и сущим во гробех живот даровавый, Господи, Иисусе Христе, Сыне Божий, молитв ради Пречистыя Твоея Матере, преподобных и богоносных отец наших и всех святых, душу от нас преставляшагося раба Твоего (*или преставльшиися рабы Твоея*) (*имя*), в селениях святых всели, и с праведными причти и нас помилуй, яко Благ и Человеколюбец.

Старший трижды приветствует всех возгласом «Христос воскрес», на что народ отвечает тоже трижды «Воистину воскрес».

Х: Христос воскрес из мертвых, смертью смерть поправ и сущим во гробех живот даровав (*трижды*).

С: Во блаженном успении вечный покой подаждь, Господи, усопшему рабу Твоему (*усопшей рабе Твоей*), новопреставленному (*новопреставленной*) (*имя*), и сотвори ему (*ей*) вечную память.

Х: Вечная память (*трижды*).

Далее под пение Тропаря Пасхи гроб выносится из храма (часовни или моленного дома) и обносится крестным ходом вокруг, а затем относится на место своего погребения. Во время опускания гроба и засыпания его землей, хор поет заупокойные тропари «Со духи праведных скончавшихся...» и прочие.

Увещевание! Миряне разрешительную молитву, которая читается только переем, совершать не могут. В таком случае общине нужно дожидаться священника, который по своем пришествии совершит над захоронением усопшего заупокойную литию, а после нее прочитает разрешительную молитву.

Чинопоследование над усопшим неправославным²¹

В «Требнике», изданном при Святейшем Патриархе Московском и всея Руси Пимене, помещено «Чинопоследование над усопшим неправославным», где указывается следующее: «Аще, некия ради благословныя вины, прилучится священнику православному совершати погребение тела усопшаго неправославнаго, творит священник начало». Можно считать, что ради «благословныя вины», то есть по уважительной причине такое последование может быть совершено мирянином в особенном случае. Например, если неправославный человек хотел принять Святое Крещение, но по какой-то уважительной причине этого не совершилось и скончался, то возможно совершение данного чинопоследование ради утешения близких. Совершается в том случае, если отсутствует священник.

²¹ Иерейское последование см. здесь: Чинопоследование над усопшим неправославным // Требник в трех частях: Часть третья. – М.: Издательство Московской Патриархии, 1984. С.342-354.

С.: Молитвами святых отец наших...

Х.: Аминь.

Чтец: Слава Тебе, Боже наш, слава Тебе. Царю Небесный... Трисвятое по Отче наш.

С.: Молитвами святых отец наших...

Ч.: Аминь. Господи, помилуй (12 раз). Слава, и ныне. Приидите, поклонимся... (трижды).

Псалом 87

Господи Боже спасения моего, во дни воззвах, и в ночи пред Тобою. Да внидет пред Тя молитва моя: приклони ухо Твое к молению моему, яко исполнися зол душа моя, и живот мой аду приблизися. Привменен бых с низходящими в ров, бых яко человек без помощи, в мертвых свободь, яко язвеннии спящии во гробе, ихже не помянул еси ктому, и тии от руки Твоея отриновени быша. Положиша мя в рове преисподнем, в темных и сени смертной. На мне утвердися ярость Твоя, и вся волны Твоя навел еси на мя. Удалил еси знаемых моих от мене, положиша мя мерзость себе: предан бых и не исхождах. Очи мои изнемогосте от нищеты, воззвах к Тебе, Господи, весь день, воздох к Тебе руке мои. Еда мертвыми твориши чудеса? Или врачеве воскресят, и исповедятся Тебе? Еда повесть кто во гробе милость Твою, и истину Твою в погибели? Еда познана будут во тьме чудеса Твоя, и правда Твоя в земли забвенней? И аз к Тебе, Господи, воззвах и утро молитва моя предварит Тя. Вскую, Господи, отрееши душу мою, отвращаеши лице Твое от мене? Нищ есмь аз, и в трудех от юности моя; вознес же ся, смирихся, и изнемогах. На мне преидоша гневи Твои, устрашения Твоя возмутиша мя, обыдоша мя яко вода, весь день одержаша мя вкупе. Удалил еси от мене друга и искреняго, и знаемых моих от страстей.

Слава, и ныне. Аллилуиа, аллилуиа, аллилуиа, слава Тебе, Боже (трижды). Господи, помилуй (трижды). Слава, и ныне.

Далее читается кафизма семнадцатая с припевом: «Аллилуиа». По статии молитва не читается, но поем: Слава, и ныне; Аллилуиа, аллилуиа, аллилуиа, слава Тебе, Боже (трижды). Затем продолжение чтения кафизмы.

Тропари по Непорочны заукойные, глас 5²²

Благословен еси, Господи, / научи мя оправданием Твоим.

Святых лик обрете источник жизни и дверь райскую, / да обрящу и аз путь покаянием, / погибшее овча аз есмь, // воззови мя, Спасе, и спаси мя.

Благословен еси, Господи, / научи мя оправданием Твоим.

Агнца Божия проповедавшие / и заклани бывше якоже агнцы, / и к жизни нестареемей, святии; / и присносущней преставльшеся: / Того прилежно, мученицы, молитве // долгов разрешение нам даровати.

²² В «Требнике» указано петь не все тропари по Непорочны (См. Требник в трех частях: Часть третья. С.347-348.).

Слава Отцу и Сыну и Святому Духу.

Трисиятельное Единого Божества, благочестно поем вопиюще: / Свят еси, Отче Безначальный, / Собезначальный Сыне, и Божественный Душе; / просвети нас, верую Тебе служащих, // и вечного огня исхити.

И ныне и присно и во веки веков. Аминь.

Радуйся, Чистая, Бога плотию рождающая во спасение всех, / Еюже род человеческий обрете спасение, / Тобою да обрящем рай, // Богородице Чистая, Благословенная!

Аллилуиа, аллилуиа, аллилуиа, слава Тебе, Боже (трижды).

Псалом 38

Рех: сохраню пути моя, еже не согрешати ми языком моим: положих устом моим хранило, внемгда востати грешному предо мною. Онемех и смирихся, и умолчах от благ, и болезнь моя обновися. Согреша сердце мое во мне, и в поучении моем разгорится огонь. Глаголах языком моим: скажи ми, Господи, кончину мою и число дней моих, кое есть? Да разумею, что лишаюся аз? Се пяди положил еси дни моя, и состав мой яко ничтоже пред Тобою, обаче всяческая суета всяк человек живой. Убо образом ходит человек, обаче все мятется: сокровиществует, и не весть, кому соберет их. И ныне кто терпение мое, не Господь ли? И состав мой от Тебе есть. От всех беззаконий моих избави мя, поношение безумному дал мя еси. Онемех и не отверзох уст моих, яко Ты сотворил еси. Отстави от мене раны Твоя: от крепости бо руки Твоя аз исчезох. Во обличении о беззаконии наказал еси человека и истаял еси, яко паучину, душу его: обаче все всяк человек. Услыши молитву мою, Господи, и моление мое внуши, слез моих не премолчи: яко пресельник аз есмь у Тебе и пришлец, якоже вси отцы мои. Ослаби ми, да почию, прежде даже не отыду, и ктому не буду.

Икос, глас 8

Сам Един еси Безсмертный, / сотворивый и создавый человека: / земнии убо от земли создахомся, / и в землю туюжде пойдём, / якоже повелел еси, / Создавый мя и рекый ми: / яко земля еси и в землю отыдеша, / аможе вси человецы пойдём, / надгробное рыдание творяще песнь: / Аллилуиа, Аллилуиа, Аллилуиа.

Ч.: Прокимен, глас 6: Аз рех: Господи, помилуй мя, исцели душу мою.

Х. (на шестой глас): Аз рех: Господи, помилуй мя, исцели душу мою.

Ч.: Блажен разумеваый на нища и убога, в день лют избавит его Господь.

Х: Аз рех: Господи, помилуй мя, исцели душу мою.

Ч: Аз рех: Господи, помилуй мя.

Х: Исцели душу мою.

Ч: К Римляном послания святого апостола Павла чтение.

Братие, мудрствуяй день, Господеву мудрствует, и не мудрствуяй день, Господеву не мудрствует. Ядый, Господеву яст, благодарит бо Бога, и не ядый,

Господеви не яст, и благодарит Бога. Никтоже бо нас себе живет, и никтоже себе умирает. Аще убо живем, Господеви живем, аще же умираем, Господеви умираем, аще убо живем, аще умираем, Господни есмы. На сие бо Христос и умре и воскресе и оживе, да и мертвыми и живыми обладает. (Зачало 113. Рим.14:6-9).

С: От Иоанна Святаго Евангелия чтение.

Х: Слава Тебе, Господи, слава Тебе.

Рече Господь ко пришедшим к Нему иудеем: Отец Мой доселе делает, и Аз делаю. И сего ради паче искаху Его Иудее убити, яко не токмо разоряше субботу, но и Отца Своего глаголаше Бога, равен Ся творя Богу. Отвеща же Иисус и рече им: аминь, аминь глаголю вам, не может Сын творити о Себе ничесоже, аще не еже видит Отца творяща, яже бо Он творит, сия и Сын такожде творит. Отец бо любит Сына и вся показывает Ему, яже Сам творит, и больша сих покажет Ему дела, да вы чудитесь. Якоже бо Отец воскрешает мертвыя и живит, тако и Сын, ихже хошет, живит. Отец бо не судит ни комуже, но суд весь даде Сынови, да вси чтут Сына, якоже чтут Отца, а иже не чтит Сына, не чтит Отца пославшаго Его. (Зачало 15. Ин.5: 17-23).

Х: Слава Тебе, Господи, слава Тебе.

Стихиры, глас 2:

Приидите, последнее целование / дадим, братие, умершему (*умершей*), / благодаряще Бога: / сей (*сия*) бо оскуде от сродства своего, / и ко гробу тщится не ктому пекийся (*пекущийся*) / о суетных, и о многострастной плоти. / Где ныне сродницы же и друзи? / Се разлучаемся. // Приидите, ко Христу припадем со слезами.

Яков живот наш есть? Цвет и дым, и роса утренняя воистинну. / Приидите убо, узрим на гробех ясно, где доброта телесная? / Где юность? Где суть очеса и зрак плотский? / Вся увядоша яко трава, вся потребишася, / приидите ко Христу припадем со слезами.

Велий плачь и рыдание, велие воздыхание и нужда, / разлучение души, ад и погибель, / привременный живот, сень непостоянная, / сон прелестный, безвременномечтанен труд жития земнаго. / Далече отбежим мирскаго всякаго греха, да небесная наследим.

Егда душа от тела имать нуждею восхитится страшными Ангелы, / всех забывает сродников и знаемых, / и печется о будущих судилищей стоянии, яже суеты и многотрудныя плоти разрешении; / тогда Судию моляще, вси помолимся, / да простит Господь, яже содела.

Приидите, братие, во гробе узрим пепел и персть, из неяже создахомся. / Камо ныне идем? Что же быхом? / Кий убог или богат? Или кий владыка? / Кий же свободь? И не вси ли пепел? / Доброта лица согни и юности весь цвет увяди смерть.

Вси телеснии ныне органы праздни зрятся, / иже прежде мало движими бяху, / вси недействительны, мертвы, нечувственны: / очи бо заидоша, связастся нозе, / руце безмолвствуете и слух с ними, / язык молчанием заключися, гробу предается. / Воистинну суета вся человеческая.

Честнейшую Херувим и славнейшую без сравнения Серафим, / без исления Бога Слова рождшую, сущую Богородицу, Тя величаем.

Слава, и ныне. Господи, помилуй (трижды). Господи, благослови.

С. говорит отпуст лицом к народу: Воскресый из мертвых, живыми и мертвыми обладай, Господи Иисусе Христе, Сыне Божий, молитвами Пречистыя Твоя Матере, святых славных и всехвальных апостол, преподобных и богоносных отец наших и всех святых, помилуй и спаси нас, яко Благ и Человеколюбец.

Х: Аминь. Вечная память (трижды). Святой Боже, Святой Крепкий, Святой Безсмертный, помилуй нас (трижды).

Чинопоследование Панихиды, совершаемая мирянином о усопшем неправославном²³

С.: Молитвами святых отец наших...

Х: Аминь.

Чтец: Слава Тебе, Боже наш, слава Тебе. Царю Небесный... Трисвятое по Отче наш.

С: Молитвами святых отец наших...

Ч: Аминь. Господи, помилуй (12 раз). Слава, и ныне. Приидите, поклонимся... (трижды).

Псалом 87

Господи Боже спасения моего, во дни воззвах, и в нощи пред Тобою. Да внидет пред Тя молитва моя: приклони ухо Твое к молению моему, яко исполнися зол душа моя, и живот мой аду приблизися. Привменен бых с низходящими в ров, бых яко человек без помощи, в мертвых свободь, яко язвеннии спящии во гробе, ихже не помянул еси ктому, и тии от руки Твоя отриновени быша. Положиша мя в рове преисподнем, в темных и сени смертней. На мне утвердися ярость Твоя, и вся волны Твоя навел еси на мя. Удалил еси знаемых моих от мене, положиша мя мерзость себе: предан бых и не исхождах. Очи мои изнемогосте от нищеты, воззвах к Тебе, Господи, весь день, воздох к Тебе руке мои. Еда мертвыми твориши чудеса? Или врачеве воскресят, и исповедятся Тебе? Еда повесть кто во гробе милость Твою, и истину Твою в погибели? Еда познана будут во тьме чудеса Твоя, и правда Твоя в земли забвенней? И аз к Тебе, Господи, воззвах и утро молитва моя предварит Тя. Вскую, Господи, отрееши душу мою, отвращаеши лице Твое от мене? Нищ есмь аз, и в трудех от юности моя; вознес же ся, смирихся, и изнемогах. На мне преидоша гневи Твои, устрашения Твоя возмутиша мя, обыдоша мя яко вода, весь день одержаша мя вкупе. Удалил еси от мене друга и искренняго, и знаемых моих от страстей.

²³ Указание служения по иерейскому чину см. здесь: Чинопоследование над усопшим неправославным // Требник в трех частях: Часть третья. С.354.

Слава, и ныне. Аллилуиа, аллилуиа, аллилуиа, слава Тебе, Боже (трижды).
Господи, помилуй (трижды). Слава, и ныне.

Далее читается кафизма семнадцатая с припевом: «Аллилуиа». По статии молитва не читается, но поем: Слава, и ныне; Аллилуиа, аллилуиа, аллилуиа, слава Тебе, Боже (трижды). Затем продолжение чтения кафизмы.

Тропари по Непорочны заупокійные, глас 5

Благословен еси, Господи, / научи мя оправданием Твоим.

Святых лик обрете источник жизни и дверь райскую, / да обрящу и аз путь покаянием, / погибшее овча аз есмь, // воззови мя, Спасе, и спаси мя.

Благословен еси, Господи, / научи мя оправданием Твоим.

Агнца Божия проповедавшие / и заклани бывше якоже агнцы, / и к жизни нестареемей, святии; / и присносущней преставльшися: / Того прилежно, мученицы, молити // долгов разрешение нам даровати.

Слава Отцу и Сыну и Святому Духу.

Трисиятельное Единого Божества, благочестно поем вопиюще: / Свят еси, Отче Безначальный, / Собезначальный Сыне, и Божественный Душе; / просвети нас, верою Тебе служащих, // и вечного огня исхити.

И ныне и присно и во веки веков. Аминь.

Радуйся, Чистая, Бога плотию рождающая во спасение всех, / Еюже род человеческий обрете спасение, / Тобою да обрящем рай, // Богородице Чистая, Благословенная!

Аллилуиа, аллилуиа, аллилуиа, слава Тебе, Боже (трижды).

Псалом 38

Рех: сохраню пути моя, еже не согрешати ми языком моим: положих устом моим хранило, внемгда востати грешному предо мною. Онемех и смирихся, и умолчах от благ, и болезнь моя обновися. Согреяся сердце мое во мне, и в поучении моем разгорится огонь. Глаголах языком моим: скажи ми, Господи, кончину мою и число дней моих, кое есть? Да разумею, что лишаюся аз? Се пяди положил еси дни моя, и состав мой яко ничтоже пред Тобою, обаче всяческая суета всяк человек живой. Убо образом ходит человек, обаче все мятется: сокровиществует, и не весть, кому соберет их. И ныне кто терпение мое, не Господь ли? И состав мой от Тебе есть. От всех беззаконий моих избави мя, поношение безумному дал мя еси. Онемех и не отверзох уст моих, яко Ты сотворил еси. Отстави от мене раны Твоя: от крепости бо руки Твоя аз исчезох. Во обличении о беззаконии наказал еси человека и истаял еси, яко паучину, душу его: обаче все всяк человек. Услыши молитву мою, Господи, и моление мое внуши, слез моих не премолчи: яко пресельник аз есмь у Тебе и пришлец, якоже вси отцы мои. Ослаби ми, да почию, прежде даже не отыду, и ктому не буду.

Икос, глас 8

Сам Един еси Безсмертный, / сотворивый и создавый человека: / земнии убо от земли создахомся, / и в землю туюжде пойдём, / якоже повелел еси, / Создавый мя и рекии ми: / яко земля еси и в землю отыдеши, / аможе вси человецы пойдём, / надгробное рыдание творяще песнь: / Аллилуиа, Аллилуиа, Аллилуиа.

Честнейшую Херувим и славнейшую без сравнения Серафим, / без истления Бога Слова рождшую, сущую Богородицу, Тя величаем.

Слава, и ныне. Господи, помилуй (трижды). Господи, благослови.

С. говорит отпуст лицом к народу: Воскресый из мертвых, живыми и мертвыми обладай, Господи Иисусе Христе, Сыне Божий, молитвами Пречистыя Твоея Матере, святых славных и всехвальных апостол, преподобных и богоносных отец наших и всех святых, помилуй и спаси нас, яко Благ и Человеколюбец.

Х: Аминь. Вечная память (трижды). Святыи Боже, Святыи Крепкий, Святыи Безсмертный, помилуй нас (трижды).

Библиографический список

1. Крещение: Требник сборник. – М.: Издательство Московской Патриархии Русской Православной Церкви, 2018. – 224 с.
2. Ригин В., прот. Молитва Святых Крещений вкратце, страха ради смертнаго // ЖМП, №12 (1984). С.80.
3. Требник в трех частях: Часть третья. – М.: Издательство Московской Патриархии, 1984. – 368 с.